

Абу-л-Қосим Маҳмуд ибн Умар  
ибн Аҳмад  
аз-ЗАМАХШАРИЙ

# Ноҳзик ибояралар



ШАРХЛАР МУАЛЛИФИ  
ВА ТАРЖИМОН

Убайдулла УВАТОВ

НАШРГА ТАЙЕРЛОВЧИ

Асад ДИЛМУРОД

Тошкент  
«Камалак»  
1992

Жаҳон фани ва маданияти тараққиётига мисленинг хисса қўшган беназир инсон, улуг аллома Абу-л-Қосим Маҳмуд ибн Умар ибн Мұхаммад аз-Замахшарийни биласизмий?

У Мұхаммад Мусо ал-Хоразмий, Абу Райхон ал-Беруний, Абу Али ибн Сино, Абу Абдулоҳ ал-Хоразмий, Абу Ҳомид Ғаззолий, имом Ислом ал-Бухорий, имом ат-Термизий каби буюк зотлар билан бемалол беллаша оладиган маърифатпарвар донишманддир. Хоразмнинг Замахшар қишлоғида туғилиб ўсган олим авлодларга бенихоя бой илмий-адабий мерос қолдирган. Маърифат дунёсида диний илмлар, лугатшунослик, грамматика (наҳв), аруз, адабиётга ва мантиққа оид элликка яқин асари, хусусан, Қуръонцар карим тафсирига бағишиланган «Ал-Қашшоғ» китоби маълум ва машҳурдир.

Қўлингиздаги китоб аввало аз-Замахшарий ижоди ва илму урфон йўлида босиб ўтгай мashaққатлари ҳақида хикоя қиласди. Китобни ўқиркансан, алломанинг ташвишли дунёси, афсонага айланаб кетган ҳаётини ҳақидаги қизиқарли маълумотлар билан танишасиз. Оммабоп руҳда ёзилган шарҳлар орқали олим мероси билан ошно бўласиз, бу мероснинг ижтимоий-бадиий моҳиятини тераң ҳис этасиз.

Китобга аз-Замахшарий ижодидагина эмас, бутун ислом маданиятида муҳим ўрин тутувчи «Нозик иборалар» рисоласи тўлалигича киритилди. Ушбу рисола асосан хикматлар ва тафсирий лавҳалардан иборат бўлиб, Қуръон гояларини улуглайди, сизни имонли, эътиқодли, пок ниятили бўлишга, маънавий дурданаларни қадрлашта даъват этади.

## A 20 Абу-л-Қосим Маҳмуд Аз-Замахшарий.

Нозик иборалар. (Шарҳлар муаллифи ва тарж. У. Уватов. Нашрга тайёрловчи Асад Дилмурод) — Т., «Камалак», 1992. — 80 б.

**Абу-л-Қасим Маҳмуд Аз-Замахшарий.** Тонкие фразы.

ББК 72.3

A 4702620106—130  
356 (04)—92

ISBN 5—633—00845—6

© Абу-л-Қосим Маҳмуд ал-Замахшарий, 1992 (бадиа, таржима, беzaқ).

Убайдулла УВАТОВ

# Ҳоми ӯзув, сўзи кутуб





## ВАТАНДОШИМИЗ АБАДИЯТИ

Хоразм воҳасида азалдан жаҳон фани ва маданияти ривожига улкан ҳисса қўшган кўплаб алломалар етишиб чиққан. Айниқса ўрта асрларда бу диёрда илм-фанинг турли соҳалари бўйича самарали ижод қилган Муҳаммад Мусо ал-Хоразмий, Ибн Сино, Абу Райҳон ал-Беруний, Абу Абдуллоҳ ал-Хоразмий, Ибн Мискавийх, Абу Наср ал-Ироқ, Абу Саҳл Масихий, Абу-л-Хайр ибн ал-Ҳаммор кабиларнинг донғи бутун Мағрибу Машриққа тарқалган. Хоразм заминида таваллуд топган буюк алломалардан бири Абу-л-Қосим Маҳмуд аз-Замахшарийдир.

Унинг тўлиқ исми Абу-л-Қосим Маҳмуд ибн Умар ибн Муҳаммад (баъзи манбаларда Аҳмад) бўлиб, у ҳижрий 467 сана ражаб ойининг йигирма еттинчисида—чоршанба куни (милодий ҳисобда 1075 йилнинг 19 марта) Хоразмнинг катта қишлоқларидан бири Замахшарда таваллуд топғаң ва шу боисдан ҳам аз Замахшарий таҳаллусини олган. Аз-Замахшарий Маккада яшаган пайтда искандариялик бир шогирди, «Ал-Ақд ас-самийн фи тарих ал-балад ал-амийн» номли тарихий асарнинг муаллифи Шаҳобуддин Аҳмад ибн Али ал-Ҳусний ал-Моликийга йўллаган мактубида ўзи ҳақида «Мен Маҳмуд ибн Умар ибн Муҳаммад ибн Аҳмад ал-Хоразмий кейин аз-Замахшарийман—Хоразмнинг бир қишлоғига (Замахшарга) мансубман, Замахшар туғилган юртимдир», деб ёзган.

Аз-Замахшарий ҳақидаги маълумотлар асосан ўрта аср араб манбаларида, қисман маълумотлар эса олимнинг ўз асарларида келтирилган. Аз-Замахшарийнинг ҳаёти ва фаолиятини ёритишда Ибн Ҳалликон («Вафойот ал-аъён»), Ибн ал-Анбарий («Нузҳат ул-алиббо

фи табақат ил-удабо»), Ёкут ал-Хамавий («Мульжам ал-удабо»), «Ибн ал-Жавзий («Ал-Мунтазам»), Жалолуддин ас-Суютий («Бүғиот ал-вуют»), Ибн ал-Кифтий («Инбах ар-Рувот») ва бошқа араб муаллифларининг асарлари асосий манбалар ролини ўтайди. Мана шу муаллифлар келтирган далилий маълумотларни умумлаштирган ҳолда аз-Замахшарийнинг оиласи, ёшлик йиллари ҳақида муайян тасаввурга эга бўлиш мумкин. Аз-Замахшарийнинг отаси унчалик бадавлат эмасди, лекин ўз даврининг саводли, анча тақводор, диёнатли кишиси бўлган, аксар вақтини Қуръони карим тиловати ва тоат-ибодат билан ўтказиб, Замахшардаги бир масжида имомлик ҳам қилган. У хулқ-атвори яхши, ширинсухан ва гоятда муруватли киши бўлиб, бу фазилати билан эл орасида катта обрў-эътибор топган. Аз-Замахшарийнинг онаси ҳам гоятда тақводор ва диндор аёллардан ҳисобланган. Асарларидан бирида ўз волидаси ҳақида аз-Замахшарий келтирган ушбу маълумотлар унинг онаси бенихоя оқила бўлганлигидан далолат беради: «Ёшлигимда бир воқеа бўлган эди. Қунлардан бир кун бир чумчуқни тутиб олиб, оёқларини ип билан маҳкам боғладим, бироқ чумчуқ қўлимдан чиқиб кетиб, девор орасига (инга) кириб бекинди. Мен уни индан тортиб чиқариб олдим. Оёғига боғланган ип сиққани натижасида қушнинг оёғи узилиб (кесилиб) тушди. Бундан онам қаттиқ хафа бўлиб: «Сен қушни оёғини кесганинг каби худо ҳам сенинг оёғингни кессин», деб мени қаргади». Маълумки, аз-Замахшарийнинг бир оёғи йўқ бўлиб, у бутун умр ёғоч оёқда юрган. Бунинг сабаблари ҳақида ёзганларида тарихчилар ҳар хил ривояtlар келтиришади. Бир сабаб қилиб онасиning қарғишини кўрсатадилар (бу ҳақда сўнгроқ батафсил ёзамиз). Мана шу маълумотларга таяниб айтиш мумкинки, олимнинг ёшлик йиллари диний, тақводорлик мұхитида шаклланиб, камол топган. Аз-Замахшарий назмий асарларидан бирида ўз ота-онаси-ю, оила аъзоларидан бирортаси на шароб-у, на бошқа хил ичимликни мутлақо истеъмол қилмаганлигини алоҳида таъкидлаши бу фикримизни янада ойдинлаштиради. Афтидан, аз-Замахшарийнинг отаси серфарзанд бўлган. Чунончи, у ўз қасидаларидан бирида фарзандлари кўп ва оиласи катта бўлгани учун ҳам отаси рўзгор тебратиш ва тирикчилик йўлида тинмай меҳнат қилиб, саъй-ҳаракат кўрсатгани ҳақида ёзади.

Аз-Замахшарийнинг отаси ҳақида келтирилган маъ-

лумотларда у бир қанча муддат ҳибсда бўлганлиги ҳам қайд қилинади. Чунки аз-Замахшарий ҳоким Муайид ал-Мулкка (у 1101 йилда вафот этган) мурожаат қилиб, илму фазилатини ва катта оила боқувчиси бўлганлигини инобатга олиб отасини тутқўнликдан озод этишини илтимос қиласди. Аз-Замахшарий отасининг ҳибсга олиниши сабаблари аниқ эмас, лекин диний қарашлари бўйича у билан ҳукмдорлар орасидаги ихтилоф туфайли бўлса керак, деб тахмин қилиш мумкин. Чунки, аз-Замахшарий оиласи муътазилий оқимиға мансуб бўлиб, унинг тартиботларига барча оила аъзолари каттиқ риоя қиласди. Хуллас, ёш Маҳмуднинг дунёқараши мана шу диндор, тақводор отанинг таъсирида шаклланди.

Аз-Замахшарий дастлабки билимни она юрти Замахшарда ўз даврининг ўқимишли кишиларидан саңалган отасидан олди. Аз-Замахшарийнинг шахсий ҳаётига доир маълумотлардан яна шу нарса маълумки, аввалроқ ёзганимиэдек унинг бир оёғи бўлмай, ёғоч оёқда юрган. Шу хусусда тарихчилардан кўпи: «Унинг бир оёғи бўлмай, ёғоч оёқда юради ва узун яктагини тушириб кийгани учун кўрган одам уни чўлоқ деб ўйларди», деб ёзганлар. Манбаларда чўлоқлигининг сабаблари ҳақида ҳам турли-туман ривоятлар келтирилади. Тарихчилардан баъзилари, қаҳратон қишида соvuқ олганлигидан, деб ёзса, айримлари, болалигига отдан йиқилиб бўлган, дейди, яна бошқаси ёшлигига бир ножӯя иш қилиб қўйганлиги учун онасининг қаргишига учраган, деб ёзади. Аниқроғи, оғир бир иллат туфайли у ёшлигига бир оёқ бўлиб қолган ва шундан сўнг отаси оғир меҳнатга ярамаслигини инобатга олиб, уни бир кийим тикувчи устага шогирдликка бермоқчи бўлади. Аммо ёшлигидан илмга ҳавасманд Маҳмуд отасидан ўзини Хоразмга — мадрасага ўқишга юборишини сўрайди. Үғлидаги илмга зўр иштиёқ ва ҳавасни сезган ота унинг илтимосини бажо келтиради. Ана шу пайтдан бошлаб ёш аз-Замахшарий илм-фанинг турли соҳалари билан қизиқиб, тенгқурлари орасида қобилияти ва истеъодини намоён қила боштайди. Мадрасада ўқитиладиган илмларни, айниқса араб тили ва адабиётини, диний илмлар мажмуасини тўлиқ эгаллайди. Шу билан бир қаторда ўша даврда илм ахллари орасида мухим ҳисобланган ҳаттотлик санъати сиру асрорини ҳам мукаммал ўзлаштириб, ундағ фойдаланади ва тирикчилигини бир қадар тузатади. Сўнг араб

тариҳчisi Йибн Ҳалликоннинг (1211—1288) ёзишича, талабалик ёшига (12 ёшларга) етгач, ўз билимини ошириш ва ҳар томондама заковат эгаси бўлиш мақсадида у Бухоро шаҳрига йўл олади. Чунки Бухоро ўша пайтда машҳур олим-филолог Абу Мансур ас-Саолибий-нинг (961—1038) ибораси билан айтганда, «Сомонийлар давридан бошлаб шон-шуҳрат макони, салтанат каъбаси ва замонасининг илғор кишилари жамланган, ер юзи адиларининг юлдузлари порлаган ва ўз даври-нинг фозил кишилари йигилган жой эди».

Афтидан, аз-Замахшарий Бухорода таҳсил қўриб юрган йилларида отаси вафот этган. Чунки у ўз девонига кирган шеърларида бирда падари буэрукворининг меҳри ва дийдорига тўймай қолганлигини, «бир том остида касалига малҳам бўла олмаганилиги»ни ғоятда таассуф ва чуқур аламу ҳасрат билац ёзди. У Бухорда ўқишини тутагатгач, бир неча йил хоразмшоҳлар хизматида бўлади, котиблиқ қиласи, ҳукмдорлар билан яқин бўлишга интилади. Бироқ қобилияти, илми ва фазилатларига муносиб эътибор кўрмагач, ўзга юртларга сафар қиласи, ўз матлабу мақсади ушалишига умид боғлайди.

Бу ўринда яна шуни татқидлаш керакки, аз-Замахшарийнинг ёшлик йиллари Салжуқийлар ҳукмдори сulton Маликшоҳ ва унинг машҳур вазири Низом ул-Мулк даврига тўғри келиб, бу ҳукмдорлар илм-фан ва маданият равнақи йўлида улкан ишларни амалга оширгандилар. Айниқса, илм-фан ва маърифат ҳомийси сифатида бутун Шарқда донг таратган бош вазир Низом ул-Мулк олимларга, шоиру адиларга катта эътибор берарди. У Шарқнинг турли-туман шаҳарларида сунний мазҳаби бўйича шариатни ўргатадиган мадрасалар ташкил қилган, улар Низомия мадрасаси номи билан машҳур эди. Шу вақтда Хоразмшоҳлар давлати Буюк Салжуқ салтанатига тобе ҳисобланар эди. Хоразмда етарли обрў-эътибор тоғмаган аз-Замахшарий салжуқийлар вазири Низом ул-Мулк хизматига киради ва Низом ул-Мулкка мадхия тарзида бир қасида ёзди. Ушбу қасидада ўз ютида хору зорлик кўрганлигини, аслида эса ўзи юқори лавозимларга сазовор эканини ва бу орзуига эришиш учун илм-фан қадрини биладиган Низом ул-Мулкдан умидвор бўлиб келганлигини таъриф этади. Бироқ бу сафар ҳам омади юришмайди, у орзу қилган мартабасига эришолмайди. Балки Низом ул-Мулк сунний мазҳабига мансублиги, аз-Замахшарий

эса мұтазилий оқимининг ашаддий ҳомийси бўлғанлиги ўртада ихтилоф түғдиргандир. Бу ҳол шу даражага етдики, агар аз-Замахшарий бирор дўстиникига бориб эшигини тақиллатса, эшикни очган хизматкорга: «Хўжайинингга бориб, Абул-Қосим ал-Мұтазилий келди, деб айт», дерди.

Шундан кейин ҳам олимнинг ҳёти янги ўлкаларга сафар қилиш билан кечади, у Хурсонга қараб йўл олади. У ердаги давлат арбобларидан баъзилари билан яқиндан танишади. Улардан бири Тож ӯд-Давланинг ноibi Мужийр ад-Давла Абу-л-Фатҳ Али ибн ал-Ҳусайн ал-Ардистоний эди. У ўз даврининг машхур котибларидан эди. Унга аatab мадхиялар битади, грамматика (наҳв)га оид «Шарҳ абият Сибавайҳ» ва «ал-Анумазаж» номли асарларини ҳам унга бағишлиб шу пайтда яратади. Шунингдек, Ибн ал-Ҷифтийнинг ёзишича, ал-Ардистонийга аatab яна бир қасида ҳам битади. Хурсонда бўлганида вазир Низом ул-Мулкнинг ўғли Убайдуллоҳга бағишлиб ҳам мадхиялар ёзади. Убайдуллоҳ Султон Абу-л-Фатҳ Маликшоҳ даврида девон ал-иншо (канцелярия)нинг бошлиғи (раиси) бўлиб, наср ва назмда етуқ адиблардан ҳисобланар, ўз биродарларидан батамом устун эди. Бирор юқорироқ лавозим олиш умидида аз-Замахшарий Убайдуллоҳга мадхиялар бағишлиди.

Шунга қарамасдан аз-Замахшарий Хурсонда ўз мақсадига эришолмайди, бу ерда ҳам унинг аҳволи Хоразмдагидан яхши бўлмайди. У яна сафарга отланиб, Салжуқийлар давлатининг пойтахти Исфаҳонга келади. Салжуқийлар сultonни Мұхаммад ибн Абу-л-Фатҳ Маликшоҳ адолатлилиги, гўзал хулиқ-атвори ва жасурлиги билан машхур эди. Аз-Замахшарий сultonнинг ушбу фазилатлари ва хайрли ишларига бағишлиб мадхиялар ёзади. Шундан кейин ҳам аз-Замахшарий ижодида подшоҳу хукмдорларга мадхиялар асосий ўринни эгаллайди, десак муболага бўлмайди. Чунончи бир қатор салжуқий ҳокимларга бағишлиб мадхиялар битгани илмий тадқиқотларда ҳам алоҳида қайд қилинган. Салжуқийларнинг подшоҳи Муиззаддин Санжар (у 511—522 ҳижрий йилларда ҳокимлик қилган) аз-Замахшарий мадҳ қилган еттинчи ҳоким ҳисобланади. Кейин хоразмшоҳ Мұхаммад ибн Ануштагин (490—521 ҳижрий йилларда ҳукм юритган) билан яқиндан танишиб, унга бағишлиб мадхиялар ёзади. «Муқаддимат ул-адаб» номли йирик асарида сultonнинг ўғли Хоразмшоҳ Отсизнинг

(у 521—551 хижрий йилларда ҳукм юритган) илм ахларига ва адилларга нисбатан ташхурлигини алоҳида таъкидлайди. Аз-Замахшарийнинг бу асарига зўр қизиқиши билан қараган Отсиз ўз шахсий кутубхонаси учун ўндан бир неча иусха кўчиртирган эди.

1118 (512 хижрий) йилда аз-Замахшарий оғир бир иллатга чалинади ва қанча азоб-уқубатларни бошидан кечириб тузалгач, энди мансаб дея ҳукмдорлар бўсағасини босмасликка онт ичади ва мол-дунё таъмасидан мутлақо воз кечади, қолган умрини фақат илм-фангага багишлашга, шогирдлар етиштиришга баҳшида этиб, асарлар яратишга астойдил қарор қиласди. Бироқ яна тез орада сафарга чиқиб, Бағдодда тўхтайди ва кўп илмлар бўйича Бағдод олимларидан сабоқ олиб, қизғин мунозараларда қатнашади. Бир муддат Бағдодда тургандан кейин яна сафарини давом эттириб Маккага боради. Макка аҳли, унинг амири Абу-л-Ҳасан Али ибн Ҳамза ибн Ваҳҳос аш-Шариф ал-Ҳасаний аз-Замахшарийни яхши кутиб олади. Амир Ибн Ваҳҳос фозил, илмли киши бўлиб, у бир қанча назмий ва насрый асарлар муаллифи ҳам эди. У аз-Замахшарийни Маккага келиши билан қизғин табриклиди, уни ғоятда улуғлаб, қадр-қимматини муносиб баҳолади. Аз-Замахшарий ҳам у билан танишганидан бехад қувониб, иккала олим бир-биридан ўзаро истифода олди, бир-бирларига багишлаб қасидалар битдилар. Аз-Замахшарий Ҳижзода бўлган пайтида Ҳамадон (Яман)ни ҳам зиёрат қилганилиги адабиётларда қайд этилган. Қасидаларидан бирида олимнинг ўзи ҳам бу ҳақда ҳикоя қиласди. У Арабистон ярим оролининг барча минтақаларини зиёрат қиласди ва ат-Таифдан тўрт кунлик йўлда жойлашган бир водийнинг тупроғиго аҳли ўзига ёқиб қолганлиги ҳақида тўлқинланниб ёзади.

Маккада икки йилча яшаганидан кейин яна ўз тупроғини қўмсаб, ватанига қайтади. Бу ўринда яна шуни қайд этиш керакки, аз-Замахшарий Хоразмга қайтиб келганида бу ерда вужудга келган сиёсий вазият унга кулиб боққанди. Чунончи Мұхаммад ибн Ануштагин асос солган хоразмшоҳлар салтанати вужудга келган эди, олдин эса у Баркуярик даврида Хоразмга воли ҳисобланар эди. Султон Санжар Хурросонни батамом эгаллагач, Мұхаммад ибн Ануштагинни Хоразм ва унинг аъмолларига ҳоким — Хоразмшоҳ лавозимига тайинлаган эди. У эса илм-фан ва адабиёт аҳлини ўзига яқин тутиб, уларга алоҳида эътибор билан қаради.

Шулар қатори аз-Замахшарий ҳам унинг муруватига сазовор-бўладики, бу ҳолни у Мұхаммад ибн Ануштагинга бағишлиңган назмий асарларида баён қилади. Хоразмшоҳ Мұхаммад вафот этгач (521 ҳижрий йил), унинг ўрнига келган Отсиз ҳам аз-Замахшарийга ва умумай илм-фан, адаб, аҳлига қатта ҳурмат-эътибор билан қарайди. Буни аз-Замахшарий ўзининг «Муқаддимат ул-адаб» асарида алоҳида таъкидлайди. Шунга қарамай у Маккадан қайтганига қаттиқ пушаймон бўлиб, ҳатто алам-ҳасратидан йиғлашгача етади. Макзун ҳолатини олим бир қанча қасидаларида ифода этади. «Ўз умрингнинг анча қисмини Маккада ўтказдинг, яна Маккага кетаман дейишиңгнинг боиси нима?» — деб сўраганларида, у: «Қалб хотиржамлиги, дил поклиғи ва ибодат лаззатини фақат Маккадагина ҳис қилиш мүмкін», деб жавоб қилади. Шундан кейин иккинчи марта Макка томон йўл олиб, Дамашқда тўхтайди. Дамашқ ҳокими Бўри Тафтакинга бағишилаб шеърлар ёзади. Чунки у Ботиния оқими тарафдорлари-га қарши курашган, улардан олти мингини ўлдирган. Дамашқ мусулмонларини салибчилардан ҳимоялаш учун уларга қарши Дамашқ араб ва туркманларига бошчилик қилиб, салибчиларни 523 ҳижрий (1128 милодий) йилда мағлуб қилган эди. Шу йилнинг ўзида у Дамашқдан чиқиб, Маккага етиб боради ва уч йил мобайнида Маккада яшайди. Ибн Ваҳҳос бу сафар ҳам аз-Замахшарийни илиқ қарши олиб, унга гоятда зўр иззат-икром кўрсатади, унинг ақидасини (муътазилияни) маъқул тоғиб, олимни ҳар томонлама қўллаб-куватлайди. Шу пайтда Ибн Ваҳҳоснинг самимий ёрдамидан илҳомланган аз-Замахшарий ўзининг Қуръони карим тафсирига бағишлиңган машҳур асари «Ал-Қашшоф»ни (бу асар ҳақида кейинроқ батафсил маълумот берамиз) ёзиб тугатади. Уч йил Маккада яшаганидан кейин аз-Замахшарий яна ўз ватани Хоразмни қўмсайди ва Маккадан чиқиб, 533 ҳижрий йилда Бағдодга келади. Бағдодда ҳам кўп олимлар сухбатида бўлади, улар билан илмнинг турли соҳалари бўйича баҳс ва мунозараларда қатнашади. Сўнгра Хоразмга қайтиб келиб, бир неча йил яшагандан кейин 538 ҳижрий йилнинг арафа кечаси (1143 милодий йил) Журжонияда (ҳоаирги Урганч) вафот этади. Шундан деярли икки юз йил кейин, яъни 1333 йили Хоразмни зиёрат қилган машҳур араб сайёҳи Ибн Баттута (1304—1377) ўзининг «Ар-Риҳла» («Саёҳатнома») асарида

Хоразм (Урганч)нинг ташқарисида аз-Замахшарий нинг қуббали мақбарасини кўрганлиги хақида ёзди.

## АЗ-ЗАМАХШАРИЙНИНГ УСТОЗЛАРИ

Аз-Замахшарий ўз даврининг иирик тилшуноси, лугатшуноси, шоири ва олими сифатида машҳурдир. У диний илmlар мажмуаси — ҳадис, тафсир, фикҳ ва қироат илми бўйича ҳам катта шуҳрат қозонган. Мазкур илmlарни муқаммал эгаллашида, ўз даврининг етук олими даражасига етишида, шубҳасиз, устозларининг хизмати бениҳоя катта бўлган. Чунончи, у ўз юрти Хоразмда ҳам, хорижий элларда бўлганида ҳам ўз даврининг машҳур олимларидан таълим олган, ҳамма жойда олиму фузалолар даврасида муттасил равишда ўз илмини оширишга ҳаракат қилган. У ёшлигидан араб тили ва араб адабиётига катта меҳр қўяди, умуман араблар ҳаётининг турли томонларини алоҳида завқ билан ўрганади.

Аз-Замахшарийнинг дастлабки устозлари Хоразмда бўлишган. Унинг камолот босқичига кўтарилишига тил, лугат ва адабиёт соҳасида доинг таратган олим Абу Мудар Маҳмуд ибн Жарийр ад-Даббий ал-Исфаҳоний алоҳида роль ўйнади. 1113 (508 хижрий) йилда Марвда вафот этган бу олим Хоразмда ҳам бир неча йил яшаган.

Машҳур араб олими ва сайёҳи Ёкут ал-Ҳамавий ал-Исфаҳоний ҳақида шундай деб ёзди: «Лугат ва нахв (грамматика) илмида ўз даврининг ягона билимдони ва ўз асрининг беназири бўлиб, унинг хилма-хил фазилатлари тўғрисида ривоятлар (масаллар) келтирадилар. Бир қанча муддат у Хоразмда истиқомат қилган бўлиб, одамлар унинг илму урфонию макорими ахлоқидан фойда кўргандилар. Кўпгина илм толиблари, шулар жумласидан, аз-Замахшарий унинг муқаммал илмидан баҳраманд бўлиб, лугат ва нахв соҳасида таълим олганлар. Хоразмга мұтазилий оқимини олиб келиб тарқатган ҳам шу ал-Исфаҳонийдир. Ал-Исфаҳоний гоятда улуғворлиги туфайли ҳалқ унга әргашиб, унинг таълимотини қабул қилган».

Шундай катта олимнинг чуқур билими-ю, илм олиш борасида аз-Замахшарий кўрсатган жидду жаҳд унинг келажакда нахв ва лугат соҳаларида етук олим бўлиб етишишига мустаҳкам замин бўлди. Аз-Замахшарий

устози ад-Даббийдан нафақат чуқур билим олди, балки унинг илмий йўналишлари, асарлар яратишдаги тартиботларини тадқиқ қилди, ниҳоят, мұтазилий оқими-нинг энг ашаддий хомийларидан бири бўлиб етишиша ҳам устози йўлидан юрди. Хорәзм ўлкасида мұтазилий оқимининг тарқалиши ва унинг мустаҳкам қарор топишида ад-Даббий асосий роль ўйнади десак ҳеч янгишмаган бўламиз! Хоразмда бу оқим таъсири шу даражага етдики, ҳатто Хоразм сўзи билан мұтазилий сўзи муродиф (синоним — хоразмий-мұтазилий) қоғияси тариқасида жаранглаб, кенг кўламда қўлланила бошланди. Ҳулласи калом, аз-Замахшарий дунёқарашининг шаклланишида, у илм-фаннынг турли соҳала-ридан (айниқса грамматика ва лугатдан) чуқур билим олишида ва ниҳоят диний әътиқодида ҳам ад-Даббий сезиларли таъсири кўрсатди. Араб миллатига мансуб бу олимнинг таъсирида аз-Замахшарий қалбида ёшлигини арабларга ва араб тилига самимий муҳаббат туйгулари қарор топдики, бу ҳолни олимнинг ўзи ҳам баъзи қасидаларида миннатдорлик ҳисси билан ифода-лайди. Ад-Даббий вафоти муносабати билан аз-Замахшарий қаттиқ қайғурари ва устозига бағишелаб мотамса-ро қасида битади.

Умуман аз-Замахшарийнинг илмий, ижодий фаоли-тида бир миллатни бошқа миллатдан устун қўйиш бўлмаса ҳам, бироқ у араб тилига, араб ҳалқининг илм-фандаги ютуқларига юқори баҳо беради, дастлаб шу диёрда бунёд бўлган ислом дини маърифат ва маданият ривожида ижобий таъсири кўрсатганини алоҳида қайд қиласди. У грамматикага бағишелган «Ал-Муфассал» асарини одамларнинг истагини ҳисобга олиб, «араб ка-лималарини билиш учун» яратгани, «Муқаддимат ул-адаб» асарини эса гайри араблар араб тилини ўрган-моғи учун ёзганини таъкидлайди.

Аз-Замахшарийнинг устозларидан яна бири Абу Бакр Абдуллоҳ ибн Талҳа ибн Муҳаммад ибн Абдуллоҳ ал-Йабарий ал-Андалусий бўлиб, у ҳам грамматика ва фиқҳ соҳасида йирик олим ҳисобланарди. Аз-Замахшарий Макқада бўлганида баъзи грамматик китобларни, жумладан, «Шарҳ китоб Сибавайҳ», «Шарҳ рисолат ибн Абу Зайд» кабиларни унинг ёрдамида ўрганганди. Ал-Йабарий 518 ҳижрий (1124 милодий) йилда вафот этган.

Аз-Замахшарий Бағдодда бўлганида ҳам қўпгина олимлар билан мулоқотда бўлиб, улардан турли илм-

лардан сабоқ олган эди. Жумладан, ҳадис илмини Абу ал-Хаттоб ибн ал-Батар, Абу Саад аш-Шаффоний, шайх ул-ислом Абу Мансур Наср ал-Хорисий, фиқх илмини шайх ал-Хайятий, ад-Дамғоний, Шариф ибн аш-Шаҗарийдан ўрганған эди. Иби ал-Қифтий шундай ҳикъя қиласы: «Аз-Замахшарий Бағдодга, бизнинг ҳузури мизга 533 ҳижрий йилда келган эди. Мен уни икки марта устозимиз Абу Мансур ибн ал-Жаволикийнинг ёнида (үйида) лугат соҳасидаги баъзи китобларни ўрганаётгандай пайтида кўрганман».

Бу ҳол аз-Замахшарийнинг бутун умри давомида, ҳатто кексайган чоғида ҳам турли илмларни ўқиб ўрганганлигини кўрсатади. Чунки 533 (1139) йилда Бағдодда юз берган бу воқеа олим олтмиш олти ёшга киргандা, яъни унинг ўлимидан атиги беш йил олдин бўлган.

Аз-Замахшарийнинг устозларидан яна бири Абу Али ал-Ҳасан ибн ал-Музаффар ан-Найсабурийдир. Ёкунт ал-Ҳамавий у ҳақда шундай ёзган: «Абу Али ал-Музаффар ан-Найсабурий Абу Али олижаноб адиг ва шоир, бир қанча асарларнинг муаллифи бўлиб, у ҳақда Абу Аҳмад Маҳмуд ибн Арслон ўзининг «Хоразм тарихи» («Тарих Хваразм») асарида: «Абу Али ал-Ҳасан ибн ал-Музаффар ал-Адийб, ад-Дарийр ан-Найсабурий сўнгра ал-Хоразмий 442 йил, рамазон ойининг 14-кунида вафот қилган. У Абу Мудар (аз-Замахшарийнинг Хоразмдаги биринчи устози)дан олдин Абу-л-Қосим аз-Замахшарийга устозлик қилган, унинг назмий ва насрый асарлари ҳам бордир», деб кўрсатган. Бу, албатта, хатодир. Чунки аз-Замахшарий, аввал зикр қилганимиздек, ал-Ҳасан ибн ал-Музаффар вафотидан (442 ҳижрий йил) 25 йил кейин (467 ҳижрий йил) туғилган.

Мана шу маълумотлардан маълум бўлиб турибдикий, аз-Замахшарий ҳаётининг талай йиллари хорижий элларда, саёҳатларда ўтган. Шу боисдан ҳам атоқли совет шарқшуноси академик И. Ю. Крачковскийнинг: «Ёғоч оёқда бўлишига қарамасдан аз-Замахшарий гоятда ҳаракатчанлиги билан ажralиб туради», дегани бежиз эмаслигини эслатиб ўтиш ўринлидир. Чунончи у, аввал ёзганимиздек, Шарқнинг кўп шаҳар ва мамлакатларида, жумладан Бухоро, Марв, Нишопур, Исфаҳон, Дамашқ, Бағдод, Ҳижоз, икки марта Маккада бўлди. Қакка аҳли, айниқса, унинг амири Иби Ваҳҳос билан аз-Замахшарий ўртасида дўстона муносабатлар қарор

топди. Амирнинг ҳомийлиги ва самимий ёрдами туфайли олим Маккада ўз илмий фаолиятини самарали давом эттириди, араб тили грамматикаси ва луғатини ҳамда махаллий қабилаларнинг тили, лаҳжалари, мақолларини чуқур ўрганди, уларнинг ўзига хос урфодатлари билан бир қаторда бу минтақа жуғрофиясига оид хилма-хил маълумотларни тўплади. Ушбу маълумотлардан унумли фойдаланган ҳолда ўзининг қатор асарларини шу Маккадалигига ёзи. Ўз ҳаётида ўчмас из қолдирган Маккаю мукаррамада аз-Замахшарий беш йилча яшади. Шу боисдан ҳам у ўз исмига Жоруллоҳ («Оллоҳнинг қўшниси») деган шарафли лақаб қўшиб айтилишига мусассар бўлди.

Маккадан бошқа ўзи бўлган қатор шаҳарларда аз-Замахшарий ўз даврининг йирик олимлари, шоир ва адиллари билан мулоқотда бўлар, улар билан дўстонა, илмий мунозаралар юритар, қизғин баҳсларда иштирок қиласади. Бу баҳслар ва мунозаралар чогида аз-Замахшарий инсоф ва адолат юзасидан фикр юритарди. Бу хусусда хоразмшоҳлар саройида бош котиб бўлган шоир ва адил Рашидуддин ал-Ватвот қизиқарли маълумотлар ёзиб қолдирган.

## АЗ-ЗАМАХШАРИЙНИНГ ШОГИРДЛАРИ

Илм-фанинг кўпгина соҳалари — тилшунослик, луғатшунослик, адабиёт, аruz, жуғрофия, тафсир, ҳадис ва фикҳ бўйича йириқ олим даражасига кўтарилиган ва ўзига хос эътиборли илмий мактаб яратган аз-Замахшарийнинг Хоразмда ҳам, Шарқнинг бошқа бир қанча шаҳарларида ҳам шогирдлари бўлиб, асосий вақтини уларга бағишларди. Оилавий ҳаёт, рўзгор ташвишлари ҳамда фараандлар тарбияси кўп вақтимни олади, илмий ва адабий фаолиятим унумли бўлишига халақит беради, деб у қариндош-уругларнинг қистовига қарамай ҳаётида бирор марта ҳам уйланмаган. Элга фойдали асарлар яратиш ва муносиб шогирдлар тайёрлашни фарзанд ўстириш билан баробар қўйган. Замондошлари аз-Замахшарий қайси шаҳарга бормасин, дарҳол мухлислари, илм толиблари унинг атрофига тўпланиб, ундаги катта билим чашмасидан баҳраманд бўлишга ошиқишлиарини маълум қиласадилар. Тарихчи Ибн ал-Қифтийнинг ёзишича, аз-Замахшарий Хуросон-

да бўлганида ҳам, Ироқда яшаганида ҳам, хуллас, қаерга бормасин — ўша жойда шогирдлари ҳозир бўлишар, ундан сабоқ олишарди. Шу боисдан ҳам турли шаҳарларда унинг шогирдлари бор эди. Уларнинг сони жуда кўп бўлиб, машҳурлари ҳақидагина қисқача тўхталиб ўтамиз.

Улардан бири Абу-л-Ҳасан Али ибн Мұҳаммад ибн Али ибн Аҳмад ибн Ҳарун ал-Умроний ал-Ҳаваризмий бўлиб, у «Хужжат ул-афодил» ва «Фаҳр ул-машойих» лақаблари билан аталар, аз-Замахшарийнинг энг яқин дўстларидан бўлиб қолганди. У устози паноҳида адабиёт, ҳадис илмларидан таҳсил кўрганди. У замонасининг етук олимий даражасига кўтарилиб, ўзи ҳам илм толибларига дарс бериб, ҳам тафсир, грамматика, жуғрофия соҳалари бўйича асарлар яратганди. У 566 ҳижрий санада вафот этган.

Аз-Замахшарийнинг қобилиятли шогирдларидан яна бири Мұҳаммад ибн Абу-л-Қосим ибн Бойчук ал-Баққолий ал-Хоразмий ал-Одамий ан-Наҳвий бўлиб, у «Зайн ал-машойих» лақаби билан машҳур эди. Ёқут ал-Ҳамавий унинг ҳақида: «Ал-адабда у имом, лисон ул-арабда хужжат (ишончли олим), лугат ва ал-иъробни аз-Замахшарийдан ўрганиб, кейинчалик унинг ўрнига ўтирган эди. Ҳадис илмини устози аз-Замахшарий ва бошқалардан ўрганди. У эътиқоди кучли, олижаноб, соғ виждонли киши эди. Унинг бир қанча асарлари бўлиб, улардан «Мифтоҳ ат-Танзийл» («Қуръон калити»), «Тақвийм ал-лисон фи-н-наҳв», «Ал-иътоб фи-л-иъраб», «Ал-Бидоя фи-л-маоний ва-л-баён», «Қитоб манозил ил-араб» ва бошқаларни кўрсатиш мумкин», деб ёзади.

Абу Юсуф Ёқуб ибн Али ибн Мұҳаммад ибн Жаъфар ал-Балҳий ал-Жандалий аз-Замахшарий билан доимо бирга бўлар, ундан сира ажралмасди. У айниқса ал-адаб илми бўйича ўз устозидан кўп сабоқ олиб, бу соҳада етук олим бўлиб етишди. Ал-Муваффақ ибн Аҳмад ибн Абу Саъийд Исҳоқ Абу-л-Муайяд ҳам аз-Замахшарийнинг муносиб шогирдларидан бўлиб, «Ахтабу Хваразм» («Хоразмнинг энг чечан хатиби, сўз устаси») лақаби билан машҳур эди. У кўп илмлар соҳасида етук олим, фақиҳ ва шоир бўлиш билан бир қаторда ўта фозил киши, араб тилининг билимдони сифатида ўятда машҳур эди. У ҳижрий 484 йилда туғилиб, 568 йилда вафот этган.

Аз-Замахшарийнинг бошқа шогирдларидан табарис-

тонлик Абу-л-Маҳосин Исмоил ибн Абдуллоҳ ат-Таъвийлий, абивардлик Абу-л-Маҳосин Абдурраҳим ибн Абдулло ал-Баззор, замахшарлик Абу Амру Омир ибн ал-Ҳасан ас-Симсор, самарқандлик Абу Саид Аҳмад ибн Маҳмуд аш-Шотий, хоразмлик машҳур фақиҳ Абу Тоҳир Сомон ибн Абдулмалик ва бошқаларни кўрсатиш мумкин.

Аз-Замахшарийга шогирд тушганилардан бири Али ибн Исо ибн Ҳамза ибн Ваҳдос Абу ат-Тайийиб эдики, бу фозил, олижаноб инсон Макка аҳлидан бўлиб, ҳазм ва насрда бир қанча асарлар ёзганди. Аз-Замахшарий Маккадалигида унга сабоқ берган эди. Ўз навбатида, тарихчи Иби ал-Қифтий қайд қилганидек, аз-Замахшарий ҳам Иби Ваҳдоснинг илмидан истифода этган. У 550 ҳижрий санада вафот этган. Юқорида зикр қилинган илм толиблари аз-Замахшарий билан шахсан мулоқотда бўлиб, ундан таълим олишган. Аммо аз-Замахшарийни шахсан кўрмаган-у, фақат унинг асарларини ўқиб ўзларини олимнинг шогирди ҳисоблаган, асарларини ривоят қилиш учун ижозат сўраган олимлар ҳам кўпчиликни ташкил этади. Мисол тариқасида улардан бир қанчасини эслатиб ўтамиш. Зайнаб Бинт аш-Шаърий етук оима сифатида кўпчиликка, шу жумладан таникли адаб ва тарихчи Иби Ҳалликонга ҳам устоэлик қилган. Шу билан бир қаторда Зайнаб Бинт аш-Шаърий аз-Замахшарийни устоз сифатида тан олган. Аз-Замахшарийни ўзига устоз билганлардан яна бири исқандариялик олим ал-Хофиз Абу ат-Тоҳир Аҳмад ибн Муҳаммад ас-Салафийидир. Шиҳобуддин Аҳмад ибн Али ал-Ҳасаний ал-Моликий, Абу Тоҳир Баракат ибн Иброҳим ал-Хушуъий ҳам аз-Замахшарийни ўзларига устоз деб тан олганлар. Ҳақиқатан ҳам аз-Замахшарийнинг асарларидан кенг кўламда фойдаланиб, унинг ғояларини ўзларига дастурул-амал қилгандар жуда ҳам кўп эди. Чунончи, аз-Замахшарий, Иби ал-Қифтий ибораси билан айтганда, «ўз даврининг алломаси, гайри араблар ўртасида араб тилида ижод қилганиларнинг энг пешвоси, бу тилда ёзилган барча асарлардан хабардор забардаст аллома даражасига етган эди».

Бу ўринда филология фанлари доктори, профессор Н. Иброҳимовнинг хоразмлик буюк олим ҳақидаги фикрлари ҳам диққатга сазовордир: «Хоразмдан етишиб чиқсан улуғ аллома Маҳмуд аз-Замахшарий араб тилининг грамматикаси ҳақида кўп қимматли асарлар ярат-

ган. Араблар айтадиларки: «Агар шу кўса, чўлоқ бўлмаганида араблар ўз тилларини билмас эдилар!» Араб тилининг грамматикаси, лексикаси, умуман араб тилшунослигига оид бир қанча асарларни шу ногирон донишманд яратган. Бу китоблар шу кунгача мусулмон Шарқида долзарблигини, қимматини йўқотмаган. Афсуски, ўзимизнинг олимларимиз, бу ишга қўл уришганига анча бўлганига қарамай, баъзи мақолалар; китобчалар билангина чекланиб қолмоқдалар. Аз-Замахшарий мероси бўйича бир қанча номзодлик, докторлик диссертациялари ёқлаш мумкин.

## АЗ-ЗАМАХШАРИЙ ВА РАШИДУДДИН АЛ-ВАТВОТ

Ўрта асрларда Хоразмда илм-фан ва маданият тоят тараққий қилган эди. Маданий ҳаётнинг бундай ривожига маҳаллий (ерли) олиму адилар, шоирлар билан бир қаторда турли сабабларга кўра узоқ эллардан, хорижий юртлардан Хоразмга келиб яшаб ижод қилған адаб ва шоирларнинг ҳам хиссаси катта бўлган. Айниқса, XI—XIII асрларда — Хоразмшоҳлар ҳукмронлиги даврида Хоразмда илм-фан аҳллари, шоиру адилар кўплаб тўпланган эдилар. Щулар жумласидан андалузиялик олим ва сайёҳ Абу Ҳамид ал-Гарнотий (1080—1169), Ибн Анийн номи билан танилган шомлик машхур шоир Шарофуддин Муҳаммад ибн Наср (1144—1232), 1153 йилда Хоразмга келган ал-Қози Ёкуб ибн ал-Жандий — у ҳақда араб тарихчиси Ибн ал-Асир: «У (ал-Жандий) фозил киши бўлиб, яхши шеърлари бор эди», деб ёзган, машхур олим ва котиблардан саналган, Xурсоннинг Наса шаҳридан Хоразмга келган Муҳаммад ибн Аҳмад ибн Али ибн Аҳмад ан-Насавий, бу ўлкага келиб, то вафотигача шу ерда яшаб ижод қилған адилардан яна бири ал-Қассоб номи билан машхур «Сарийъ ал-Қаас» лақабли нишопурлик адаб Муҳаммад ибн ал-Ҳусайнни кўрсатиш мумкин. Лекин ўша даврда Хоразмга келиб, шу ерда яшаб ижод қилғанлар ичида асли балхлик шоир ва адаб, машхур котиб Рашидууддин ал-Ватвот алоҳида ўрини эгаллайди. Унинг тўлиқ исми Муҳаммад ибн Муҳаммад ибн Абдужалил ал-Умарий бўлиб, у Рашидууддин ал-Ватвот номи

билин машҳурдир (ватвот—арабча кўршапалак бўлиб, у бўйи паст, тепакал ва башараси хунук бўлганидан шундай ном билан аталган бўлса керак).

Рашидууддин ал-Ватвот 487 ҳижрий (1094 милодий) йилда Балхда туғилиб, ёшлиқ йиллари шу шаҳарда ўтган. Балх ўша пайтда Хуросоннинг ҳар томонлама гуллаб-яшнаган йирик шаҳарларидан бири ҳисобланниб, унда кўпдан-кўп мадрасалар, масжидлар ва кутубхоналар мавжуд бўлган. Ал-Ватвот ўша пайтда Балхнинг энг эътиборли мадрасаларидан бири саналган Низомия мадрасасида таникли олим имом Абу Саъд ал-Харавийдан таҳсил олгац. У мадрасани муваффақиятли та момлаб, амалий фаолият билан шуғулланади ва тез орада ўз даврининг кўзга кўринган шоири ва адиби сифатида танилади. Сўнгра у Хоразмга келиб, ўзининг таъкидлалича, умрининг охиригача бу ерда яшайди. Ал-Ватвотнинг Хоразмга келган йилини ҳозирча аниқ айтиш мумкин бўлмаса-да, у бу ерда ўттиз йил чамаси бўлганини ҳисобга олсан, у Хоразмга XII асрининг ўрталарида, етук шоир ва котиб сифатида эл орасида кенг танилганидан кейин келган бўлса керак деб таҳмин қилиш мумкин. Чунки у хоразмшоҳлар саройида катта ҳурмат ва эътибор билан қарши олинниб, аввал Хоразмшоҳ Отсиз, кейин унинг ўғли Алоуддин Текиши саройида маҳсус котиб (котиб ал-хосс) мазифасини ўтаб, ҳукмдорларга яқин кишилардан бири бўлиб қолади. Ҳокимлар ўртасидаги расмий мурасолатлар (ёзишмалар)нинг нозик ва нафис жиҳатларини тўла эгаллаганилиги, мактублар жанрини иухта ўзлаштирганилиги, араб ва форс тилларини мукаммал билганлиги, шубҳасиз, ал-Ватвотнинг хоразмшоҳлар саройида энг эътиборли кишилардан бири бўлишида катта роль ўйнади. Унинг фаолиятидаги қисқа муддатни ҳисобга олмагандан ал-Ватвот то умрининг охиригача (у 1182 ёки баъзи манбаларда 1191 йилда Хоразмда вафот этган) хоразмшоҳлар саройида хизматда бўлди.

Рашидууддин ал-Ватвот ўз даврининг машҳур шоири, адиби ва котиби бўлиб, ҳам араб, ҳам форс тилида баракали ижод қилган. У ўз ижодий фаолияти мобайнида йигирмадан ортиқ насрий ва назмий асарлар яратган бўлиб, уларнинг аксар қисми бизгача етиб келган. Биз унинг «Ар-Расоил» («Мактублар») асари хусусида бир қадар муфассал тўхтalamиз. Араб тилида ёзилган бу мактублар 1156—1173 йиллар орасида битилган

бўлиб, Хоразмшоҳ Отсизнинг (у. 1127—1156 йилларда ҳокимлик қилган), набираси сultonшоҳ Маҳмудга (у 1172—1193 йилларда ҳокимлик қилган) бағишланади. Ал-Ватвотнинг бу мактублари «Мажмуат ар-расоил» («Мактублар тўплами») номи билан аталган бўлса-да, ҳозирги илмий адабиётларда қисқача «Ар-Расоил» («Мактублар») деб юритилади. Мазкур мактублар дастлаб Муҳаммад Афанди Фаҳмий томонидан 1898 йилда Қоҳирада нашр қилинган. Шунингдек, ал-Ватвот мактубларининг бир қисми кейинчалик СССР Фанлар Академияси Шарқшунослик институти Ленинград бўлимининг қўлёзмалар фондидаги сақланаётган с 816 рақамли қўлёзмага ҳам киритилган.

«Ар-Расоил» икки қисмдан иборат бўлиб, биринчи қисми халифалар, сultonлар, ҳоқонлар, вазиру амирлар, ҳокимлар, қози ва муфтийлар номига жўнатилган турли туман мактублардан, иккинчи қисми эса олимлар, юқори мансабли амалдорлар, машхур шахслар, шоиру адиллар ва муаллифнинг ўз дўисту биродарларига йўллаган битикларидан иборатdir.

«Ар-Расоил»да ўша давр сиёсий, иқтисодий, ижтимоий ва маданий ҳаётига доир кўпдан-кўп маълумотлар келтирилган. Рашидуддин ал-Ватвотнинг мактубларини ўрганиш жараёнида унинг ўз она шаҳри Балхдан Хоразмга келиш сабаблари бир қадар ойдинлашади. Чунончи у Балх аъёнларидан кимгadir йўллаган мактубларидан бирида Балх аҳли ўзига нисбатан инсоф юясидан иш тутмаганлиги, улар бу билан унинг фазилатларини тан олишмагани, ўз элининг дури, яхшиларининг пешвоси бўлган шундай кишини унутганилклари қайд қилинади. Шунга кўра ал-Ватвотнинг Хоразмга келиши сабабларидан бири — унинг ўз ютида муносиб эътибор ва иззат-икром кўрмаганлигига эканлигини сезиш қийин эмас.

Ал-Ватвот ўз даврининг кўпгина адиб ва шоирлари билан шахсан таниш бўлиб, уларнинг аксарияти билан хат ёзишиб турган. Ал-Ватвотнинг ўз замондоши хоразмлик машхур олим, адиб ва шоир Маҳмуд аз-Замахшарий билан муносабатлари диққатга сазовордир. Манбаларда келтирилишича, ал-Ватвот аз-Замахшарийга шогирд тушиш истагини билдириб, асарларидан кенг кўламда фойдаланиш учун ундан рухсат олишга муясисар бўлган. Ал-Ватвот «Ар-Расоил»да келтирилган бир мактубда ўша пайтда Маккада яшайтган аз-Замахшарийга: «Ҳар қанча хошишим бўлса-да, имконим йўқли-

ги-ю, насиб этмаганлиги туфайли Маккани зиёрат қилишдек улуғ неъматдан маҳрумман», деб изтироб билан ёзади.

Рашидуддин ал-Ватвот билан аз-Замахшарий ўртасида кўпдан-кўп ижодий баҳслар, дўстона сұхбатлар ва мулоқотлар бўлиб ўтган. Ушбу учрашувларга асосла ниб ал-Ватвот аз-Замахшарийнинг олим сифатидаги баъзи хусусиятлари ҳақида ҳам қимматли маълумотлар келтиради. «Устоз (аз-Замахшарий) билан ўртамизда—унинг ижодий фаолияти даврида ҳам, роҳатда бўлган вақтларида ҳам—адабиётнинг турли жиҳатлари ва араблар илмларининг ҳар хил масалаларига оид кўпдан-кўп илмий сұхбатлар бўлган эди. Шу сұхбатлар чоғида устоз менинг сўзларимга диққат билан қулоқ тутар ва мен кўтарган масалаларга ғоятда эътибор билан қараб, кўпинча уларни маъқулларди. Чунончи мунозара чоғида ҳақиқатга амал қилишлик унинг саодатли ишларидан эди. Кейин у ўзи маъқул топган масалаларни яна бирин-кетин санаб чиқарди... Устознинг гўзал фазилатларидан ушбу арзимас бир мисолни ёшлиарни (ундан) воқиф қилиш ниятида келтирдим,— деб ёзади Рашидуддин ал-Ватвот.— Чиндан ҳам бу инсон—гарчанд барча билимларни (тӯла) эгаллаган ва жамъий воқеаларнинг соҳиби бўла туриб—ҳақиқатнинг аччиқлиги-ю, ҳалолу покликнинг (қайноқ) ҳароратига қарамасдан ўта сабр-тоқатли киши эди. Ҳатто ўзига зарар бўлса-да, у доимо адолат юзасидан иштутар эди».

Яна бир ўринда Рашидуддин ал-Ватвот аз-Замахшарийга мактуб йўллаб ёзади: «Жаноб олийлари Жоруллоҳ аз-Замахшарий илм толибларига фойда келтиришда феъл-авторлари кенг ва бу борада у жаноб ғоятда саҳийдир. Шунга кўра ўз ўтирган муқаддас (Маккада яшашётган) жойларидан туриб ёхуд хати-шарифлари орқали—чунончи бу бутун умрим бўйича мен учун бир катта шараф, узоқ ойлару йиллар давомида (мен учун) бир фахр бўлиб қоларди—ёинки ўз хизматкорлари жамоасидан ва жаноблари неъматлари бўстонидан баҳраманд бўладиганлардан тўғри сўзлигига ишонадиган ва ушбу рисолани етказишига таянадиган бирор киши орқали рухеат беришингизни ўтиниб сўрайман. Бу борада ҳазратлари маъқул кўрган фикр энг олий ва ғоятда тўғридир». Натижада аз-Замахшарий ўз асрларидан фойдаланиш учун ал-Ватвотга ижозат берган. Ҳатто аз-Замахшарий вафотидан кейин ҳам Рашид-

дуддин ал-Ватвотниң ўз устозига нисбатан ҳурмати баланд бўлиб, уни бениҳоя улуглаган ва устози асарларини ҳар хил ноўрин тузатиш ва ўзгартиришлардан ҳимоя қилган. Бу хусусда ал-Ватвот ўша давр машхур олимларидан бирига йўллаган мактуб боятда ибратлийдир: «Яқинда қўлимга устоз (аз-Замахшарий)нинг «Асос ал-балога» асарининг бир нусхаси тушшиб қолди. Қарасам, асарга шундай ўзгартиришлар киритилганки, буларни эътиборсиз шу зайлда қолдиришни виждоним мақбул кўрмайтири... Башарти оллоҳ умрларини узоқ қилгур ҳазратлари (яъни сиз) маъқул кўрсалар, мен ушбу нусхани оллоҳ руҳини мунааввар қилгур Жоруллоҳ аз-Замахшарийнинг шахсан ўзлари кўриб чиқсан нусха билан муқобил қилиб, ўзгартирилган галат ибораларни тузатаман. Жанобларига мен томонидан бениҳоя кўп шукурлар ва битмас-туғанмас ҳамду санолар бўлсин».

Рашидуддин ал-Ватвот ўз даврининг кўпгина адиб ва шоирлари билан яқин муносабатда бўлганилигини олдин эслатган эдик. Шу маънода унинг адиб ал-Ҳасан ал-Қаттон билан ёзишмалари эътиборга моликдир. Ал-Ватвотни яхши билган, дунёнинг кўп мамлакатлари қатори Хоразмни ҳам зиёрат қилған машҳур араб олими ва сайёҳи Ёкут ал-Ҳамавий (1179-1229) ўзининг машҳур «Муъжам ал-удабо: («Адиблар қомуси») асарида: «Мен Марвда бўлганимда шайх Фахриддин Абу Музаффар Абдураҳим тож ўл-Ислом Абду Саад ас-Самъоний менга ал-Ҳасан ал-Қаттон Рашидуддин ал-Ватвотга йўллаган мактубидан бир қисмии кўрсатган эди. Бу хатда у ал-Ватвотни ўз китобларини ўғирлашда айблаб, уни роса койиганини кўрганман», деб ёзади. Дарҳақиқат, ал-Қаттон билан ал-Ватвот ўртасидаги ёзишмаларда ал-Қаттон уни китобларини ўғирлашда айблайди. Лекин ал-Ватвот ўз жавобида буни тухмат ва бўхтон деб рад қилиб қуийдаги жавобни ёзади: «Мен бўлсам—оллои таоло билгацидек—горат қилиш тугул уни эшигини ҳам очмаганман, на унинг (ал-Қаттонни) бирорта китобини ўғирламаганман. Лекин лутфан қилган илтимосига кўра китобларини (бошка), қароргоҳига қўчириб ўтказиш учун бир куни уникига борган эдим. Хонадонига кирганимда беҳад даражада кўп китобларни кўрдим ва унга, бунчалик кўп китобларни бир жойдан иккинчи жойга ўтказиш қийин иш, дедим-да, китобларни ўз жойида қолдириб, қандоқ кирганди бўлсам шундайин халтаю-ҳақибам (сумкам) бўш ҳолда

уидан чиқиб кетдим». Бу тарздаги ҳатлар адиллар бир-бирларининг насрый ва назмий ижодларидан иборалар олишлари ва бир-бирларини қўчирмачиликда айблашлари азалдан бўлган иллат эканлигини ҳам кўрсатади.

Рашидуддин ал-Ватвот Хоразмда яшаган давр, аввал айтиб ўтганимиздек, хоразмшоҳлар салтанат юритган даврга тўгри келади. Унинг мактубларидан бири орқали Хоразмда ўша пайтда тинчлик ва осойишталик барқарор бўлганини биламиз. Шу боисдан ҳам хорижий эл-юртлардан турли-туман табақага мансуб кўплаб одамлар кёлиб Хоразмда яшаганлар. «Хоразм шу дараҷага бориб етдики,—деб ёвади Рашидуддин ал-Ватвот,— у қўрқкан ва хавф-хатарга тушганлар учун бехатар макон, элма-эл қезиб юрадигайлар учун маскан, мусофири гарибларга манзилгоҳ, дарвишлар учун паноҳжой (бошпаноҳ) бўлиб қолди. Одамлар Хоразмга ҳар тарафдан ўз кулфату мусибатларидан изтиробга тушиб, ҳасрату надоматларидан қалблари куйиб-ёниб нажот излаб келардилар-у, барча иллатлари шифо топган, дарду аламлари бартараф бўлган, жамийки юмушташвишларидан қутулган ҳолда Хоразмдан қайтардилар. Аллоҳ таолога—кенг кўламли бундай улуғлиг-у, бу дараҷадаги олий ҳимматни мусассар кўрганлиги учун беҳад ҳамду санолар бўлсин».

Ал-Ватвот мактубларидан ўща даврда Хоразмдаги сиёсий, ижтимоий ва маданий ҳаёт ҳақида ҳам муайян тасаввурга эга бўламиз. Жумладан, мактублар ёрдамида ал-Ватвот кофиirlар (аҳл ал-куфр) деб атаган турк кўчманчи қабилалари вақти-вақти билан Хоразмга ҳужумлар уюштириб турганлигини биламиз. Хоразмнинг оғир иқлими — ёзда жазира маиси, қишида қаҳратон совуғи ҳақидағи хабарлар билан бир қаторда, ўша пайтда Хоразмда яшаган кўпгина олимлар, шоир ва адиллар, илмий-маърифий тўгаракларнинг фаолияти ҳақида ҳам катта тасаввурга эга бўламиз.

Рашидуддин ал-Ватвот мактублари тили ва услубининг нағислиги, ибораларининг теранлиги билан ҳам ажralиб туради. Унинг аз-Замахшарийнинг шогирди қози Жамолуддин Ёқуб ибн Ширин, аббосийлар халифи ал-Муктафий, шоир ал-Хоқоний, салжуқийлар сultonи Санжарнинг сарой шоири Собир ибн Исмоил ат-Термизийга йўллаган мактубларида юқсан бадиий маҳорат эгаси эканлигини, насрый сажъ услубидан фоятда усталик билан фойдаланганини, котиблик

санъатининг сиру асрорларини бекаму кўст эгаллаганини кўрамиз.

Юқоридагилардан холоса қилиб айтиш керакки, аз Замахшарийнинг замондоши, Хоразм заминида узоқ муддат яшаб ижод қиласан балхлик шоир, адаб ва котиб Рашидуддин ал-Батвот қолдирган илмий ва адабий меросни ҳар томонлама чуқур ўрганиш ҳам, шубҳасиз, Ўрта Осиё ҳалқлари тарихи ва маданиятини тўла ёритишида муҳим аҳамият касб этади.

## АЗ-ЗАМАХШАРИЙНИНГ ИЛМИЙ ВА ИЖОДИЙ ФАОЛИЯТИ

Буюк мутафаккир аз-Замахшарий бизга бой ва улкан илмий мерос қолдирган. У тилшунослик, лугатшунослик, адабиёт, аruz, жуғрофия, тафсир, ҳадис, фикҳ ва илм ал-қироатга оид эллиқдан ортиқ асарлар яратган бўлиб, уларнинг аксарияти бизгача етиб келган.

Аз-Замахшарий ижодининг кенг қўламлилиги ва унинг илм-фан оламида тутган ўрнинй билиш мақсадида унинг замондошлари ва кўйинги асрларда яшаган тадқиқотчилар айтган фикр-мулоҳазалардан айримларини келтирамиз. Машҳур тарихчи Иби ал-Қифтий у ҳақда бундай деган: «Худо раҳмат қилгур аз-Замахшарий илм ул-адаб, нахв ва лугат бобида ўзгаларага мисол бўладиган аллома эди. У ўза ҳаёти давомида кўплаб буюк олимлар ва фозиллар билан учрашган бўлиб, тафсир, ҳадис, нахв ва бошқа соҳалар бўйича бир қанча асарлари бордир. У ўз асирида араб тилида ижод қиласан ажамлилар (ғайри араблар) орасида энг буюгидир». Машҳур олим Иби Халликон ёзади: «Аз-Замахшарий тафсир, ҳадис, нахв, лугат ва илм ул-баён бўйича буюк имомдир. Ҳеч бир муболағасиз мазкур илмларда у ўз даврининг ягонаси, кўпдан-кўп ажойиб асарларнинг муаллифи эди». Аз-Замахшарийдан бир неча аср кейин яшаган таниқли Миср тарихчиси Иби Тағриберди аллома тўғрисида: «Шайх, буюк аллома, ўз даврининг ягонаси, ўз асрининг энг пешвоisi ва имоми бўлган», деб қайд қиласан.

Аз-Замахшарий ўз илмий ва ижодий фаолиятида, аввал таъкидлаганимиздек, араб тили ва адабиётига чуқур ҳурмат билан қараган ва ўз асарларини факат араб тилида ёзган. Унинг асарлари мазмун жихатидан

илем-фанинг кўпгина (айниқса ижтимоий) соҳаларини қамраб олган бўлиб, уларнинг сони ироқ олими доктор Фозил Солих ас-Самарийнинг ёзишича, элликдан ҳам ошиб кетади. Олимнинг асарларини мазмунига қараб, асосан қуйидаги гуруҳларга бўлиш мумкин:

- а) диний илмлар ва уламолар ҳақида;
- б) լуғатшунослик;
- в) грамматика (нахъ);
- г) аруз;
- д) адабиёт;
- е) мантиқ.

Хоразмлик буюк аллома аз-Замахшарий элликдан ортиқ асарлар ёзганилиги ҳақида юқорида қайд қилган эдик. Бахтимизга уларнинг аксар қисми бизгача етиб келган. Олим асарларининг турли даврларда кўчирилган қўлёзма нусхалари дунёнинг йирик шарқшунослик марказларида сақланади. Алломанинг кўп асарлари эса қайта-қайта нашр қилинган ва ҳозирги вақтда ҳам тадқиқотчилар томонидан янги-янги нашрлари тайёрланиб, чоп этилмоқда.

Буюк ватандошимиз ижодига бўлган қизиқиш айниқса хорижий Шарқ мамлакатларида бугунги кунда ҳам жуда катта. Мамнуният билан шуни қайд қилиш керакки, мустақил Ўзбекистонимизда ҳозирги вақтда содир бўлаётган улкан ўзгаришлардан бири – бой ва қадимий маданий меросимиз, тарихимиз, динимиз, қадриятларимиз, маданиятимизни муносиб баҳолаш ва янада равнақ топтиришга алоҳида аҳамият бериладиганнидир.

Шу нуқтаи назардан қараганда, ҳаёти ва самарали ижодий фаолияти деярли ўрганилмаган, ҳали бирорта ҳам асари тўлиғича ўзбек тилига таржима қилинмаган буюк аллома аз-Замахшарий тадқиқотчиларимиз дикқатини ўзига тортиши табиийдир.

Шу боисдан ҳам биз бу рисоламизда аз-Замахшарийнинг илмий жамоатчиликка маълум бўлган асарларининг ҳар бири ҳақида имкони борича, маълумот беришга ҳаракат қилдик. Ушбу маълумотлар мазмuni ва ҳажми жиҳатидан бир хил тарзда тўлиқ бўлмаса-да, келгусида аз-Замахшарий ижоди билан шуғулланувчилар учун фойдадан холи бўлмас деб ўйлаймиз. Олимнинг муҳим аҳамиятга эга бўлиб, илм аҳлларига яхши таниш «Ал-Кашноф», «Ал-Муфассал», «Муқаддимат ул-адаб», «Асос ал-балоға» каби манҳур асарлари ҳақида кенгроқ, муфассалроқ ёзган бўлсан, унинг

фақаттина тор доирадаги мутахассисларга маълум айрим асарлари тўғрисида эса ихтиёризмидаги қисқа, муҳтасар маълумотларни келтириш билан че гарапандик.

## «АЛ-МУФАССАЛ ФИ САНЬАТ АЛ-ИЪРАБ» («ФЛЕКСИЯ САНЬАТИ ҲАҚИДА МУФАССАЛ КИТОБ»)

Араб тили грамматикасига бағишланаб ёзилган бу асар қисқача «Ал-Муфассал» деб аталиб, аз Замахшарий Маккада яшаган пайтида – 513–515 йиллар ичida ёзилиб (1119 йил декабрининг бошлари – 1121 йилнинг март ойи) тугалланган.

«Ал-Муфассал» араб тили нахву сарфини ўрганишда йирик қўлланма сифатида азалдан Шарқда ҳам, Гарбда ҳам донги кетган асарлардан ҳисобланади. Кўпчилик мунаққидлар аз Замахшарийнинг бу асари ўз илмий қиммати жиҳатидан таниқли араб тилишуноси Сибавайхнинг (у 796 йилда вафот этган) араб тили грамматикасига оид машхур «Китоб Сибавайх» идан кейин иккинчи ўринда туради, деб таъкидлаганлар. Уша даврнинг ўзидаёт бу асар барча ҳалқлар, ҳатто араблар орасида ҳам катта эътибор қозонади ва араб тилини ўрганишда асосий қўлланмалардан бири сифатида омма орасида кенг тарқалади. Ҳатто Шом (Сурия) ҳокими Музаффариддин Мусо кимда-ким аз Замахшарийнинг ушбу асарини ёд олса, унга беш минг кумуш танга цул ва саруно совға қилишга ваъда берган. Бир қанча кишилар аз Замахшарийнинг бу асарини ёд олиб, мукофотга ҳам сазовор бўлганилиги манбаларда келтирилган. Бу мисол аз Замахшарий асарининг ўша даврда ҳам қанчалик юқори баҳоланганилигини кўрсатади. «Ал-Муфассал» нинг бир қўллэзмаси Тошкентда, Абу Райхон Беруний номли Шарқшунослик институти қўллэзмалар фондида (5198-рақамда) сақланади. Асарнинг немис тилига таржимаси 1873 йилда нашр қилинган. Катта илмий қимматга эга бўлган «Ал-Муфассал»га тилшунос олимлар томонидан кўплаб шарҳлар ёзилган. Немис шарқшуноси К. Броккељманнинг фикрича «Ал-Муфассал»га ёзилган шарҳларнинг сони ўттизга яқин экан. Асарнинг биринчи нашри 1859 йилда Кристянада Ж. Р. Брош томонидан чоп этилган

(баъзи адабиётларда икки марта чоп этилгани қайд қилинади). «Ал-Муфассал»нинг кўп сонли шарҳларидан энг машҳури ўрта асрларда яшаган суриялик грамматик олим Муваффақ ад-Дин Абу-л-Бақо Йаъийш ибн Али ибн Йаъийш ал-Халабий (1158—1245) томонидан ёзилган шарҳ ҳисобланади. Мазкур шарҳ 1882 йилда Лейпцигда икки жилдда босилган. «Ал-Муфассал»га ёзилган бошқа шарҳлар ичидан имом Фахриддин Мухаммад ибн Умар ар-Розий (вафоти 606 ҳижрий йил), Мухаммад ибн Саъд ал-Марвазий (вафоти 609 ҳижрий йил) ларнинг шарҳи мухимдир, шунингдек, Садр ул-афозил ал-Хоразмий номи билан машҳур бўлган Абу Мухаммад Мажд ад-Дин ал-Қосим ибн ал-Ҳусайн «Ал-Муфассал»га учта шарҳ ёзган бўлиб, улардан бири «Ат-Тахмийр» деб аталади. Унинг қўлёзма нусхалари Британия музейида ва Дамашқда сақланади; Фахриддин ал-Хоразмийнинг «Ал-Муфассал»га ёзган шарҳидан бир қўлёзма нусхаси Дамашқда, «Аз-Зоҳирия» кутубхонасида сақланмоқда. Аз-Замахшарийнинг бу машҳур асари араб мамлакатларида, жумладан, Мисрда бир неча марта нашр қилинганини ҳам қайд этиш ўринлидир.

«Ал-Муфассал фи санъат ил-иъраб» номи билан аталмиш ушбу китобим тўрт қисмдан иборат», деб таъкидлайди аз-Замахшарий китобига ёзган муқаддимасида. Биринчи қисм — исмлар, иккинчи қисм — феъллар, учинчи қисм — кўмакчилар, тўртинчи қисм ушбу ҳоллар муштарак бўлганлардан иборатдир».

## «АЛ-ҚУСТОС» («АНИҚ МЕЗОН»)

Аruz ilmiga oид бу асарининг тўлиқ номи «Ал-Қустос ал-мустақийм фи иълм ил-аруз» («Аруз илмida аниқ мезон»)дир. Тарихчи Журжи Зайдонийнг ёзишича, «Ал-Қустос»нинг баъзи нусхалари Берлин ва Лейденда сақланади. 1970 йилда Нажафдаги (Ироқ) «Ан-Нуъмон» матбаасида оима Баҳийжа Боқир ал-Ҳусний томонидан «Ал-Қустос»нинг танқидий нашри чоп этилган.

## «НАВОБИҒ УЛ-КАЛИМ»

(«НОЗИҚ ИБОРАЛАР»)

Аз-Замахшарий Маккада яшаган пайтида ёзилган бу асари «Ал-Калим ан-навобиғ» деб ҳам юритилади. Унинг қўлёзмаларидан бир нусхаси Бағдодда Ироқ Миллий музейида (563-рақамда), ундан ташқари Берлинда (8676), Лейденда (891 ва 92-рақамларда) ҳам сақланади. Насрий сажъ услубида ёзилган бу асар асосан ҳикматлар, насиҳат ва ўғитлар мажмуаси бўлиб, хилма-хил мавзуларни қамраб олган. Бу асар араб мамлакатларида бир неча марта нашр қилинган. Асарнинг 1914 ва 1927 йиллардаги Коҳира нашри, 1306 ҳижрий йили Байрутда Муқаммад ал-Кистий ал-Байрутий томонидан бажарилган нашри унинг дастлабки нашрларидан ҳисобланади. Бундан ташқари профессор Баҳийжа Боқир ал-Хусний тадқиқ қилган танқидий нашри эса 1971 йилда «ал-Араб» мажалласида босилиб чиқди. Голландиялик олим Генрих Альберт Шультеин 1772 йилда аз-Замахшарий асарини лотинчага ўғирди. 1876 йилда эса франциялик шарқшунос Барбier Мейнард томонидан бажарилган тадқиқот асарнинг французча таржимаси билан чоп этилган. Асар Мустафо Исомуддин томонидан туркчага ҳам таржима қилиниб, 1283 ҳижрий йилда Истамбулда нашр этилган.

«Навобиғ ал-калим»га бир қанча шарҳлар ҳам битилган бўлиб, улардан Самарқандда, Амир Темур саройида хизматда бўлган йирик аллома Саъдуддин ат-Тафтазонийнинг (вафоти 792 ҳижрий йил) «Ан-Ниъам ас-савобиғ фи шарҳ ин-навобиғ» («Ан-Навобиғ»нинг шарҳида улкан неъматлар») эътиборта моликдир. Мазкур шарҳ 1286 ҳижрий йилда Қоҳирада чоп этилган.

Хоразмлик олим Абу-л-Ҳасан ибн Абдулаҳоб ал-Ҳивакий ёзган шарҳ (у 770 ҳижрий йилда битилган) дан бир қўлёзма нусха Берлинда (8675-рақамда) сақланади.

## «АТВОҚ УЗ-ЗАҲАБ» («ОЛТИН ШОДАЛАР»)

Бу асарнинг тўлиқ номи «Атвоқ уз-заҳаб фи-л-мавоиз ва-л-хутаб» («Ваъз ва хутбаларда олтин шодалар») бўлиб, аз-Замахшарий уни Макқадалик пайтида, ўзининг илмий фаолияти барқ урган даврда яратган. Асарнинг дастлабки номи «Ан-Насоих ас-сигар» («Кичик насиҳатлар») деб аталиб, юз мақоладан иборат ибраторумуз ҳикматлар, фойдали насиҳат ва гўзал ахлоқий ўғитлардан иборатdir. «Атвоқ уз-заҳаб»га шарҳ ёзган Мирза Юсуфхон ал-Аштиёний шундай ҳикоя қиласи: «Аз-Замахшарий бу асарини Маккани (байтуллоҳни) тавоғ қилган вақтида ёзган. Чунончи байтуллоҳни тавоғ қилиб ҳар бир айланганидан кейин бир мақола ёзган. Мақолани ёзиб, яна айланган ва шу тариқа юз марта тавоғ қилганидан сўнг юз мақола ёзилган». «Атвоқ уз-заҳаб» асари мазмуни билан танишар эканмиз, муаллиф унда ўз даврининг ижтимоий-иқтисодий ва маънавий ҳаётига доир кўп масалаларни қамраб олганлитини кўрәмиз. У мақолаларда золим ҳукмдорларни ҳам, фалсафа ва илм ул-фалак тарафдорларини ҳам кескин танқид қиласи. Порахўр қозиларни, адилар, илм аҳллари ўртасида бўлган ашаддий кўчирмачиликни, мол-дунёга хирс қўйган уламоларни койиб, ижтимоий иллатлар ҳақида очиқ-оидин ёзди. «Атвоқ уз-заҳаб» бир қанча тилларга таржима қилинган. Жумладан Фон Жозеф фон Хаммер томонидан бажарилган немисча таржимаси арабча асли билан 1835 йилда Венада, ўша йили яна Лейпцигда босилган, шунингдек, Густав Файл 1863 (баъзи адабиётларда 1836) йилда Штутгартда бошқа немисча таржимасини нашр эттирди. «Атвоқ уз-заҳаб» билан француз шарқшуноси Барбье Мейнард ҳам қизиқиб, француз тилига қилган таржимасини 1876 йилда Парижда бостириди. Шунингдек, у асарнинг туркчага ағдарилиган таржимаси 1288 ҳижрий йилда Константинополда чоп қилинди. «Атвоқ уз-заҳаб»нинг 1314 ҳижрий йилда босилган. Байрут нашри 1321 ҳижрий йилда Мирзо Юсуфхон ибн Иътисом ал-Малик томонидан ёзилган шарҳ (у «Қалоид ул-адаб фи шарҳ «Атвоқ уз-заҳаб» деб аталади) билан Мисрдаги «Тамаддун» матбаасида, 1328 йилда Мисрдаги «Ас-Саодат» матбаасида, 1925 йилда яна қайтадан Мисрда «Ал-Маҳмудия» матбаасида тиҷорий нашр сифатида босмадан чиқкан.

## **«АЛ-ФОИҚ ФИ ҒАРИБ ИЛ-ҲАДИС» («ҒАРИБ ҲАДИСЛАР ҲАҚИДА АЖОЙИБ АСАР»)**

Араб тарихчиси Ибн ал-Асирнинг ёзишича, аз-Замахшарий ҳадисларга бағишлаган бу асарини 516 ҳижрий йилда алифбо тартибида яратган. Машхур тарихчи Ибн Ҳажар ал-Асқалоний: «Аз-Замахшарийнинг «Ал-Фоиқ фи ғарив ил-ҳадис» китоби гоятда ихчам бўлгани билан мазмунан кенг қамровлиги ва нақллари тўғрилиги билан ажралиб турадиган яхлит бир асардир», «деб ёзади. Бу асар 1324 ҳажрий йилда Ҳайдарободда икки жилда нашр қилинган. 1945-1948 йилларда Қоҳирадаги Исо ал-Бобий ал-Ҳалабий матбаасида тадқиқотчилар Али ал-Бажовий ва Муҳаммад Абу-л-Фазл Иброҳим бажарган тадқиқот билан бирга чоп этилган.

## **«АЛ-МУҲАДЖОТ БИЛ-МАСОИЛ АН-НАҲВИЯ АВ АЛ-АҲАЖИЙ АН-НАҲВИЯ» («ГРАММАТИК МАСАЛАЛАРГА ОИД ЖУМ- БОҚЛАР»)**

Аз-Замахшарийнинг грамматикага дөир бу асари кўпгина тарихий асарларда икки хил номда учрайди. Ас-Суютий, ал-Лакнавий ва Тошкопрізода асарни «Ал-Аҳажий ан-наҳвия» деб зикр қиласалар, Ибн Ҳаликон, ал-Бўстоний ва К. Броккельман эса «Ал-Муҳажжот бил-масоил ан-наҳвия» («Наҳв масалалари бўйича жумбоқлар») деб аташади. Шунингдек, бу асар бир қадар бошқа номлар билан ҳам юритилади.

Асар ёзилган йил ҳақида муаллиф ҳеч нарса демаган, лекин у «Ал-Қашшоф»дан (бу асар 528 ҳижрий санада ёзилган) кейин, аз-Замахшарий ҳаётининг охирги йилларида Макка амирларидан бўлган Улай ибн Исо ибн Ҳамза ибн Ваҳҳосега тухфа қилинган. Улай ибн Ваҳҳос олим, фозил ва шариф киши бўлиб, энг фасоҳатли ва балогатли илм аҳлларидан бири эди. Унинг қаламига бир қатор ажойиб назмий ва насрый асарлар мансуб эди. Ибн Ваҳҳос олдин аз-Замахшарийдан тълим олган бўлса, ўз навбатида аз-Замахшарий ҳам ундан кўп нарса ўрганганди. Улар ўзаро метиндеқ

дўстлик ишлари билан шу даражада маҳкам боғланган эдиларки, ҳатто назмда бир-бирларига мадҳиялар бағишилардилар. Аз-Замахшарий Ибн Ваҳҳоснинг илмини юқсак баҳолаб, ўзининг машхур китоблари «Ал-Қашшоғ»ни ва таҳлил қилаётганимиз «Ал-Муҳожат»ни ҳам унга бағишилаб яратган эди.

## «АСОС УЛ-БАЛОҒА» («БАЛОГАТ АСОСЛАРИ»)

Хожи Халифанинг «Қашф уз-зунун», номли машхур бир библиографик китобида аз-Замахшарий-нинг «Асос ул-балоға» («Балогат (фасоҳат) асосла-ри») ҳақида: «У («Асос ул-балоға») ҳажми катта. мазмунан бой, адаб фанининг мустаҳкам асоси бўлиб, унда лугавий мажозлар, адабий ўзига хос хусусиятлар ва фасоҳатли иборалар моддаларига қараб тартиб билан берилган асардир», деб ёзган.

Машхур адаб Журжи Зайдон асарга юқсак баҳо бериб, шундай дейди: «Асос ул-балоға» ўз услуби билан араб тилининг бекиёс мухим мұжамидир (түлиқ қомусидир), чунончи у ибораларниң қўлланилиши ва уларниң якка ўзи ҳамда матнда келганда жумлалардаги ўрни хусусида баҳс юритади. Агар бирор моддани (бандни шарҳлаш керак бўлса, унинг қўлланиладиган ўринларини аниқ кўрсатади. Шу сабабдан ҳам бу асар гоятда фойдалидир».

«Асос ул-балоға»ниң бир нодир нусхаси Ўзбекистон Фанлар академияси Шарқшунослик институтида (5234-рақамда) сақланади.

Аз-Замахшарий ўз асарининг манбалари ҳақида гапириб, арабларнинг фасоҳатли лугатидан, турли туман насрый ва назмий ёзма манбалардан йиққан (тўплаган) ажойиб ибораларга, шунингдек, бозорларда, масжиду жомелардаги сўзга чечан хатиблардан эшигтанларига асосланиб ёзгани ҳақида зикр қиласди. Шу билан бир қаторда «Асос ул-балоға»ниң асосий манбаларини қуйидагилардан иборат дейиш мумкин:

- 1) Қуръони карим;
- 2) пайғамбар ҳадислари;
- 3) Умар, Али каби халифалар, саҳобалар ва бошқа фасоҳатли нотиқларниң калимаю сўалари;

- 4) Жоҳилия, исломдан аввалги ва ислом шоирларининг шеърлари;
- 5) масаллар;
- 6) араблар насрий асарларида қўлланилган иборалар.

## **«АЛ-УНМУЗАЖ ФИ-Н-НАҲВИ»**

### **(«ГРАММАТИК НАМУНАЛАР ҲАҚИДА»)**

Бу кичик китоб «Ал-Унмузаж» деб ҳам аталиб, аз Замахшарий ўзининг «Ал-Муфассал» асааридан қисқартириб олган шаклидир. У бу мўъжаз асарини Мужийр ад-Давла Абу-л-Фатҳ Али иби ал-Хусайн ал-Ардистонийга ҳадия қилган. Бу асар 1289 ҳижрий йилда биринчи марта Қохирада «Ал-Мадорис ал-маликия» матбаасида, 1298 ҳижрий йилда эса Истамбулдаги «Ал-Жавоиб» матбаасида аввал Абу-л-Фазл Ахмад иби Мухаммад ал-Майдонийнинг «Нузҳат ут-тарфи фи-йлм ис-сарфи», ундан кейин эса Жамолуддин Абу Мухаммад Абдуллоҳ иби Юсуф иби Ҳишомнинг «Қавсид ал-иъраб» номли китобига илова тариқасида чоп этилган. «Ал-Анмузаж»га бир қанча шарҳлар ёзилган бўлиб, уларнинг қўллёзма нусхалари дунёнинг Қохира, Искандария, Бағдод, Берлин, Гота, Париж, Вена, Лондон, Лейден каби шаҳарларида сақланмоқда.

## **«ТАЪЛИЙМ АЛ-МУБТАДИЙ ВА ИРШАД АЛ-МУҚТАДИЙ»**

### **(«ИБТИДОГА ЎРГАТИШ ВА ЭРГАШГАНГА ЙУЛ КЎРСАТИШ»)**

Бу асарнинг бир қўллёзма нусхаси Қохирадаги «Дор ул-кутуб ал-мисрия» кутубхонасида (4254-рақамда) «Расоил» мажмусаси сирасида (таркибида) сақланади. Бу китоб араб тилидаги қийин бўлмаган ибораларнинг форсча таржимаси бўлиб, араб тилини дастлаб ўргана бошлаганлар учун мўлжалланган. Жумладан, ў китобчада мана шунга ўхшаш савол-жавоблар бор:

«— Мен сенга бир гап айтаман!  
— Қандай гап айтасан?

— Шундай гап айтаманки, ундан сен хурсанд бўласан.

— Менга ҳеч қанақа гап айтма, чунки мен сенинг гапингни ҳам, менга қарашингни ҳам истамайман».

## «РАБИЙЪ УЛ-АБРОР ВА НУСУС-УЛ АХЁР»

### («ТАҚВОДОРЛАР БАҲОРИ ВА ФОЗИЛЛАР АХБОРИ»)

Аз-Замахшарийнинг бу китоби адабиёт, тарих ва бошқа қатор илмларга оид маълумотларни ўз ичига олган йирик асардир. Асарнинг тўрт жилдан иборат бўлган бир қўлёзма нусхаси Бағдоддаги ал-Авқоф кутубхонасида (9786-рақамда), бошқа нусхалари Берлин (8351, 8352, 8353-рақамларда), Лейденда (470-рақамда) сақланади. Шунингдек, асарнинг муҳим бир қўлёзма нусхаси Қоҳирадаги «Дор ул-кутуб»да (155-рақамда) мавжудdir. Аз-Замахшарийнинг бу асари Нуриддин Мұҳаммад ибн Неъматуллоҳ Шаваштарий томонидан форс тилига ҳам таржима қилинган бўлиб, у «Захр ур-рабийъ» («Баҳор гуллари») деб аталади. Ушбу таржиманинг кўпдан-кўп қўлёзма нусхалари бўлиб, улар жаҳоннинг турли қўлёзма жамғармаларида сақланади. Шунингдек, «Рабийъ ул-аброр» турк олими Ошиқ ал-Чалабий (вафоти 979 ҳижрий йил) томонидан турк тилига ҳам ағдарилган. Ундан бир нусха Венада (378-рақамда) сақланади. «Рабийъ ул-аброр»нинг мухтасар ҳолга келтирилган нусхалари ҳам бир қанчадир. Асар Қоҳирада ҳам нашр қилинган. Ироқлик олима Баҳийжа Боқир ал-Хусний «Рабийъ ул-аброр»нинг баъзи қисмлари устида тадқиқот олиб бориб, уларни нашр эттирган.

## «АР-РИСОЛАТУ ФИ ҚАЛИМАТ ИШ-ШАҲОДА»

### («ШАҲОДАТ ҚАЛИМАСИ ҲАҚИДА РИСОЛА»)

Гарчи баъзи олимлар (масалан, ал-Хуфий) аз-Замахшарийнинг бу асарини диний илмлар мажмуасига

киритсаларда, аслида бу асарда грамматикага оид фикр устун бўлиб «щаҳодат» калимасининг сўз туркумлари асосида тусланиши ҳақида баҳс юритилади. Бу асарни олима Баҳийжа Боқир ал-Хусний тадқиқ қилиб, уни Ироқ фанлар академиясининг махсус журнали (15-сони)да нашр эттирган. Журжи Зайдоннинг таъкидлашича, бу асарнинг баъзи нусхалари Берлинда сақланар экан.

## «САМИЙМ УЛ-АРАБИЯ» («АРАБ ТИЛИНИНГ НЕГИЗИ»)

Аз-Замахшарий ҳаёти ва ижодини ўрганган баъзи олимлар, масалан, ал-Хуфий муаллифнинг бундай асари борлигини шубҳа остига қўядилар. Бироқ қўп тадқиқотчилар эса аз-Замахшарийнинг шу номли асари бўлганилигини таъкидлаганлар. Бағдодда, Ироқ Миллий музейи қошидаги кутубхонада аз-Замахшарийга мансуб «Самийм ул-арабия» (1002-рақамда) номли бир қўллэзма сақланади. Унинг ғилофига «Бу аллома Жоруллоҳ аз-Замахшарий қаламига мансуб «Асос ул-луғат» асарининг муҳтасар шаклидир», деган жумла ёзилган. Профессор ас-Самараийнинг фикрича, «бу асар аз-Замахшарийнинг «Асос ул-луғат» асарининг муҳтасар шакли бўлиши мумкин эмас, чунки бу иккала асарнинг ёзилиш услуби бир-биридан тамомила фарқ қиласди. Афтидан, у Ибн ас-Сакийтнинг «Ислоҳ ул-мантиқ» ёки шунга ўхшаш китоблардан бирининг муҳтасар қисмидир». Яна шуни қайд қилиш керакки, аз-Замахшарийнинг «Асос ул-луғат» номли асари бўлмай, бу ўринда эҳтимол унинг қаламига мансуб «Асос ул-балога» асари назарда тутилаётган бўлса керак. Бу масаланинг бир томони. Йккинчи томондан, бу муҳтасар қисмда келтирилган матнни чуқур ўрганилса, у аз-Замахшарийнинг «Самийм ул-арабия» асари бўлмай, балки Фасийҳ Саалабнинг китобига ёзилган ва айнан шу ном, яъни «Самийм ул-арабия» деб аталган шарҳи-эканлиги аён бўлади.

## **«АЛ-ҚАСИДА АЛ-БАУДИЯ»**

**(«ЧИВИН ҲАҚИДА ҚАСИДА»)**

Аз-Замахшарийнинг ал-Газзолий кўтартган масалаларга бағишиланган бу асаридаң бир нусха Берлинда сақланади (7686, 7687-рақамларда). Ироқ олимаси доктор Баҳийжа Боқир ал-Хусний аз-Замахшарийнинг ушбу асарини тадқиқ қилган бўлиб, уни «Ал-Устоз» журналида чоп эттирган.

Қомус тарзидағи бу китоб уч минг тўрт юз олтмиш бир масални ўз ичига олади. Масаллар алифбо тартибида берилган. Аз-Замахшарий бў асарини 499 ҳижрий санада ёзиб тутатган. Олим Муҳаммад Абдураҳмоннинг асар ҳақидаги тадқиқоти Ҳайдарободдаги «Мажлис Доират ул-маориф ал-Ўсмония» матбаасида 1381 ҳижрий (1962 милодий) йилда нашр этилган. Унинг бир қўлёзма нусхаси Қоҳирадаги «Дор ул-кутуб ал-Мисрия» кутубхонасида, бошқа нусхалари Европанинг бир қанча йирик шаҳарларидаги қўлёзмалар жамғармаларида сақланади.

## **«АЛ-МУЪЖАМ АЛ-АРАБИЙ АЛ-ФОРСИЙ»**

**(«АРАБЧА-ФОРСЧА ҚОМУС»)**

Доктор ал-Хуфий «Аз-Замахшарий» деб аталадиган китобида асарнинг номини шу зайлда келтиради. Эҳтимол бу асар муаллифнинг «Муқаддимат ул-адаб» асарининг туркча (ал-Хуфийда хоразмча) таржимасидир. Бу таржима 1951 йилда Истанбулда нашр қилинган. Асарнинг Ветсштайн томонидан бажарилган џашри эса 1843 йили Лейпцигда чоп этилган.

## **«АЛ-МИНХОЖ ФИ-Л-УСУЛ»**

**(«УСУЛ (ИЛМИ)ДАГИ ТАРТИБОТЛАР»)**

Аз-Замахшарийнинг бу асари ҳақида Ёкут ал-Ҳамавий, Ибн Халликон, Абу-л-Ҳасанот ал-Лакнавий, Ибн Қутлубуга, Исмоил Пошша ал-Бағдодий, шунингдек, немис шарқшуноси К. Броккельман ҳам ёзишган ва уни «Ал-Минҳож фи усул ид-дийн» («Дин асослари

ҳақида дастур» номи билан зикр қилишган. К. Броккельманнинг ёзишича, «Ал-Минҳож»нинг бир қўлёзма нусхаси Берлинда (615-рақамда) сақланади.

## **«АЛ-МУФРАД ВА-Л-МУАЛЛАФ ФИ-Н-НАҲВИ»**

**(«ГРАММАТИКАДА БИРЛИК ВА ҚЎПЛИК»)**

Бу асарнинг бир қўлёзма нусхаси Истанбулдаги Кўпрули кутубхонасида (1393-рақамда), ундан кўчирилган бошқа бир нусхаси (3740-рақамда) Лалалийда сақланади. 1967 йилда Ироқ олимаси доктор Баҳийжа Боқир ал-Хусний томонидан тадқиқ қилинган бу асар Ироқ Фанлар академиясининг журналида (15-сонида) нашр қилинган.

## **«АЛ-МУФРАД ВА-Л-МУРАККАБ ФИ-Л-АРАБИЯ»**

**(«АРАБ ТИЛИДА БИРЛИК ВА ҚЎПЛИК»)**

Бу асар, баъзи муаллифлар таъкидлаганидек, «Ал-Муфрад ва-л-Муаллаф фи-н-наҳви» асари билан бир асар эмас. Чунончи, Ёқут ал-Ҳамавий ҳам («Иршод ул-арийб», 7-жилд, 150-бет), Ибн Халликон ҳам («Вафа-йот ал-аъён», 4-жилд, 254-бет) уни ажратиб, алоҳида асар сифатида кўрсатишган. Шу билан бир қаторда доктор ал-Ҳуфий уларнинг иккаласини бир китоб деб кўрсатган.

## **«НУЗҲАТ УЛ-МУСТААНИС»**

**(«ДЎСТЛАР ФАРОФАТИ»)**

Ушбу асарнинг бир қўлёзма нусхаси Истанбулнинг Оя София кутубхонасида (4331-рақамда) сақланади. Профессор ас-Самараийнинг фикрича, бу асар аз-Замахшарийнинг бошқа йирик асари «Рабий ул-аброр»нинг муҳтасар бир бўлاغидир. Мазкур қисм 93 боб-

дан иборат бўлиб, 220 варажни ташкил қизади. Ушбу нусхани 838 йили олтинчи жумодул увлода Али ибн Аҳмад ибн Али Аш-шаай ас-Сейси ал-Фосий кўчирган.

## «НУКАТ УЛ-АЪРАБ ФИ ФАРИБ ИЛ-ИЛЬРОБ»

(«ҚУРЬОННИНГ АЖОЙИБ ИФОДАСИДА АРАБЛАР НАФОСАТИ»)

Ушбу асарнинг бир қўлёзма нусхаси Қоҳирадаги «Дор ул-кутуб ал-мисрия» кутубхонасида сақланади (25102б-рақамда). Бу асар асосан «Ал-Кашшоф»дан олинган масалалар мажмуасидан иборат.

## «АЛ-ЖИБОЛ ВА-Л-АМКИНА ВА-Л-МИЙОХ»

(«ТОҒЛАР, ЖОЙЛАР ВА СУВЛАР ҲАҚИДА»)

Бу жуғрофий характердаги қомусий асарни ёзишда аз-Замахшарий кўпгина маибалардан фойдаланган. Муаллиф Маккада бўлган пайтида ўзига энг яқин киши — ҳам устози, ҳам шогирди ҳисобланган Абу-л-Ҳасан Али ибн Исо ибн Ваҳҳосдан олган аниқ ва муфассал маълумотларни ўз китобига киритган ва ҳар сафар унинг номини зикр қилган. Энг муҳим жойи шундаки, аз-Замахшарий Али ибн Исо ибн Ваҳҳосга таяниб келтирган маълумотлардан машҳур араб жуғрофий олимни Ёқут ал-Ҳамавий ўзининг «Муъжам ал-булдон» номли иирик асарида фойдаланган. Ўз навбатида аз-Замахшарий бир қанча ўринларда араб олимни ал-Асмойининг «Жазийрат ул-араб» («Арабистон ярим ороли») асаридан фойдаланган.

Аз-Замахшарийнинг бу асари Европада биринчи марта 1856 йилда Лейденда, таникли олим Жойнболдининг шогирди шарқшунос Сальвер де Граве томонидан лотинча таржимаси билан нашр қилинди. Ҳозирги вақтда бу тадқиқот нодир нашрлардан ҳисобланади. Сўнгра 1962 йили Нажафда (Ироқ) Ҳайдария матбаасида асарнинг тижорат нашри тайёрланди, бироқ бу нашр қатор

хато ва камчиликлардан ҳам холи эмас. Профессор Иброҳим ас-Самарайй томонидан тайёрланган бу нашр 1938 йилда Багдолла «Ас-Саъдун» матбаасида босмадан чиқкан.

## «МУҚАДДИМАТ УЛ-АДАБ» («АДАБИЁТГА КИРИШ»)

Аз-Замахшарийнинг хоразмшоҳ Алоуддавла Абдулмузаффар Отсизга бағишилаб ёзилган «Муқаддимат ул-адаб» асари алоҳида аҳамиятга эгадир. Бу ўринда шуни таъкидлаш керакки, хоразмшоҳлар салтанат юритган даврда илм-фан, маданият анчагина тараққий қилган эди. Ҳукмдорлар, айниқса хоразмшоҳ Отсиз олимлар, шоир ва адилларга ҳурмат ила қараши билан бир қаторда унинг ўзи ҳам истеъоддли, гоятда маърифатпарвар, адабиётта қизиқкан, билимдон бир ҳоким эди. Унинг даврида илм-фан тараққиёти йўлида бир қанча хайрли ишлар амалга оширилган эди. Шу сабабдан бўлса керак аз-Замахшарий ўзининг ажойиб лугат китоби «Муқаддимат ул-адаб»ни унга бағишилаб ёзган. Асар беш катта қисмдан иборат бўлиб, отлар, феъллар, боғловчилар, от ўзгаришлари ва феъл ўзгаришлари ҳақида баҳс юритади. Асарнинг ёзилган йили маълум бўлмаса-да, манбалардаги далилларни ўрганиш натижасида аз-Замахшарий бу асарини Маккадан қайтгандан кейин, 1137 йилда ёзиб тугаллаганлиги аниқланди.

Аввал айтиб ўтганимиздек, аз-Замахшарий ўзининг бир неча йил давом этган сафарлари чоғида кўпгина араб мамлакатларида бўлди ва шу сафарлари чоғида араб тили, унинг лугатлари ва лаҳжалари хусусида бой маълумот тўплади. Шу боисдан ҳам муаллиф бу асарида ўша даврда араб тилининг истеъмолда бўлган барча сўзлари, ибораларини қамрашга ҳаракат қилған, уларни этимология нуқтаи назаридан етарли даражада кенг ва тўла ёритишга интилган. Шу боисдан ҳам аз-Замахшарийнинг бу йирик асари мазкур хусусиятга эга бўлган дастлабки асарлардан десак ҳеч бир муболаға бўлмайди. «Муқаддимат ул-адаб» форс тилидан ташқари чигатой, мўғул ва турк тилларига ҳам таржима қилинган. Манбаларда таъкидланишича, асарнинг чигатой тилидаги таржимаси аз-Замахшарийнинг ўзи

томонидан бажарилганлиги фараз қилинади. Бу фикр-нинг тўғрилигига далиллардан биттаси асар, аввал айтиб ўтганимиздек, хоразмшоҳ Отсизга бағишланган ва у тушуниши учун асарнинг арабча матни билан биргаликда чигатой тилидаги таржимасини ҳам ёзганлиги шубҳасизdir.

«Муқаддимат ул-адаб» асари яратилган давридан бошлиб бир неча асрлар давомида олимлар, тадқиқотчилар диққатини ўзига тортиб келаётir. Асар биринчи марта 1706 йилда Ҳўжа Ноҳоқ Исҳоқ Афанди томонидан усмонли турк тилига таржима қилинган. Сўнгра Европанинг бир қанча тилларига (француз, немис) ағдарилиган. Париж, Лейпциг, Вена, Лейден, Қозон, Норвегия, Миср ва Ҳиндистонда бир неча маротаба нашр қилинган. Немис олимларидан Ватзастайн «Муқаддимат ул-адаб»нинг Европа қўллёзма фондларидаги еттига қўллёзмасини қиёсий ўрганиб, 1850 или Лейпцигда асарнинг икки жилдлик танқидий матнини нашр эттирди. Шунингдек, Ватзастайн бу мукаммал нашрни фиҳрист билан биргаликда чоп қилганлиги сабабидан мазкур нашр қимматли манбалардан ҳисобланади. Асарнинг чигатой тилидаги таржимаси ўзбек тили тарихини ўрганувчилар учун муҳим аҳамиятга эгадир. Бу ҳақда Садриддин Айний ҳам 1921 или «Меҳнаткашлар товуши» газетасига ёзган мақоласида: «Аз-Замахшарийнинг «Муқаддимат ул-адаб» асари ўзбек тили учун бутун дунёнинг ҳазинаси билан баробардир», деб ёзган эди. Ҳонаси келганда аз-Замахшарийнинг бу муҳим асарининг бир неча қўллёзмалари Тошкентдаги Шарқшунослик институтида ўз тадқиқотчиларига мунтазир ҳолда сақланаётганлигини эслатиб ўтиш ўринли бўлса керак.

## «АЪЖАБ УЛ-АЖАБ ФИ ШАРХИ ЛОМИЯТ ИЛ-АРАБ» («ЛОМИЯТ УЛ-АРАБ ШАРХИДА АЖОЙИБНИНГ АЖОЙИБИ»)

Бу асар исломдан аввал яшаган араб шоири Шанфара Аздийцинг (вафоти 570 йил) «Ломият ул-араб» номли машхур қасидасига бағишиланиб ёзилган шарҳdir.

Аз-Замахшарий бу асарида «Ломият ул-араб»ни кўпдан-кўп грамматик изохлар билан мукаммал равишда щарҳлаган. Асар дастлаб 1300 хижрий йилда Константинополдаги «Ал-Жавоиб» матбаасида нашр этилган. Кейин ҳам бу асар Қоҳирада икки марта — биринчи бор 1324 хижрий санада, иккинчи марта эса 1928 милодий санада чоп этилган.

## «МАҚОМОТ АЗ-ЗАМАХШАРИЙ»

(«АЗ-ЗАМАХШАРИЙ МАҚОМЛАРИ»)

Аз-Замахшарийнинг «Мақомлари» олим Маккада биринчи марта бўлгандан ёзилган бўлиб, Маққа амири Ибн Ваххосга тухфа қилингандир. Аз-Замахшарий 512 хижрий йилда оғир касалликка учраб, тузалганидан кейин ёзилган ва эллик мақоладан ташкил топган бу асар ибраторумуз ҳикоятлардан иборатdir. Мазкур асарга аз-Замахшарийнинг ўзи томонидан ёзилган шарҳ («Мақомот аз-Замахшарий») киритилиб, у биринчи марта 1312 хижрий йилда Қоҳирада чоп этилган. Иккинчи нашри эса 1325 хижрий санада Қоҳирадаги «Ат-Тавфик» матбаасида амалга оширилган.

## «ШАРҲ АБИАТ КИТОБ СИБАВАЙҲ»

(«СИБАВАЙҲ КИТОБИ БАЙТЛАРИНИНГ  
ШАРҲИ»)

Аз-Замахшарийнинг бу асарини Ибн ал-Қифтий бир қадар соддалаштириб, «Шарҳ китоб Сибавайҳ» деб атаган. Бу асар араб олимни Сибавайҳнинг араб тили грамматикасига доир машҳур китобига ёзилган шарҳ бўлиб, унинг бир қўлёзма нусхаси Истанбулдаги Аҳмад ас-Солис кутубхонасида сақланади. Қўлёзма 111 варакдан иборат. Баъзи олимлар (масалан, ал-Хуфий) бу асар Сибавайҳнинг китобига ёзилган шарҳ бўлмай, балки аз-Замахшарий ўз асарини шундай ном билан зикр қилади, деб таъкидлаганлар.

## **«АЛ-АСМО ФИ-Л-ЛУГАТ»**

**(«ТИЛДА ИСМЛАР»)**

Профессор ал-Хуфийнинг ёзишича, бу мўъжаз битик аз-Замахшарийнинг йирик асари «Муқаддимат ул-адаб»нинг бир жузъидир, чунончи, унинг биринчи қисми исмлар (отлар), тўртинчи қисми эса исмларнинг тусланишига багишланган.

## **«АЛ-АМОЛИЙ ФИ-Н-НАҲВИ»**

**(«ГРАММАТИК ҚОИДАЛАРДА ОРФОГРАФИЯ»)**

Аз-Замахшарийнинг араб тили грамматикасига оид бу асарининг номи Ибн ал-Қифтийда шу тарзда зикр қилинган. Бироқ бошқа муаллифлар, масалан, Ибн Халликон «Ал-Амолий фи кулли фанн», Исмоил Пошша ал-Бағдодий эса қисқача «Ал-Амолий» деб зикр қилган. Бу асар бизгача етиб келмаган бўлса керак, чунончи, замонавий фиҳристларнинг тадқиқотларида ва каталогларда унинг қўллёзмалари ҳақида ҳозирча ҳеч бир маълумот учратмадик.

## **«КИТОБ ХАСОИС УЛ-АШАРАТ УЛ-КИРОМ АЛ-БАРАРА»**

**(«САХИЙ, КАРОМАТЛИ ЎН КИШИНИНГ  
ХУССИЯТЛАРИ ҲАҚИДА КИТОБ»)**

Аз-Замахшарий бу асарининг бир қўллёзмаси Қоҳирада, яна бир нусхаси эса Берлинда (965б-рақамда) сақланади. Араб олимни, профессор Баҳийжон Боқир ал-Хусний тадқиқ қилган бу асар 1968 йилда Бағдодда Ироқ маданият ва ахборот вазирлиги томонидан нашр этилган.

## **«АД-ДУР АД-ДОИР АЛ-МУНТАҲАБ ФИ КИТАБОТ ВА ИСТИЬАРАТ ВА ТАШБЕҲОТ ИЛ-АРАБ»**

**(«АРАБ КИТОБОТ, ИСТИОАРАТ ВА  
ТАШБЕҲОТЛАРИДАГИ ТАНЛАНГАН  
ГАВҲАРЛАР»)**

Мазкур асардан бир қисмининг қўллөзмаси Лейпцигда (873-рақамда) сақланади. Асарни профессор Баҳийжа Боқир ал-Ҳусний тадқиқ қилган бўлиб, у Ироқ фанлар академиясининг 1968 йилги 16-сонли маҳсус нашрида чоп этилган.

## **«ДИЙВАН УТ-ТАМСИЙЛ» («АССИМИЛИЯЦИЯ ҲАҚИДА ДЕВОН»)**

Аз-Замахшарийнинг бу асари кўпгина тарихчилар (масалан, Ибн Халликон, Ёқут ал-Ҳамавий, Исмоил Пошиша, Ибн Қутлубуға, ал-Бўстоний ва бошқалар) томонидан зикр қилинса-да, бироқ унинг ҳозиргача етиб келгани ҳақида ҳеч қандай маълумот учратмадик.

## **«ДИЙВАН УР-РАСОИЛ» («МАҚТУБЛАР ҲАҚИДА ДЕВОН»)**

Аз-Замахшарийнинг бу асари Ибн Халликонда шуном билан келтирилса-да, Ёқут ал-Ҳамавий бир оз бошқачароқ келтиради. Бу асарнинг бизгача етиб келганини ҳозирча аниқлай олмадик.

## **«ДИЙВАН УШ-ШЕЪР» («ШЕЪРИЙ ДЕВОН»)**

Бу асарни Ибн Халликон шундай ном билан келтиради. Аз-Замахшарийнинг ўзи эса бу асарини «Дийван ул-манзум» деб зикр қиласди.

Асар ҳажм жиҳатидан катта бўлиб, Ироқ олимни Баҳийжа Боқир ал-Ҳусний томонидан тадқиқ қилинган нашри Бағдодда чоп этилган. Умуман ҳозирги замон олимларининг таъкидлашларича, аз-Замахшарий бир неча шеърий девонлар тузган. Улардан айримларигина бизгача етиб келган. Шундай девон қўллөзма нусхалари-

дан бири Мисрда «Дор ул-кутуб ва-л-адаб» да (А-529-рақамда) сақланади. Девонга кирган шеърлар мавзу жиҳатидан ранг-барангдир. Олимнинг хизмати шундаки, у лирикани тор мавзу доирасидан олиб чиқиб, ижтимоий, илмий-маърифий, фалсафий масалалар билан ҳам бойитган.

## **«АР-РОИЗ ФИ-ИЪЛМ ИЛ-ФАРОИЗ» («ВОРИСЛИК ҲУҚУҚИ ИЛМИ БЎЙИЧА МАШҚ»)**

Ибн Халликон аз Замахшарийнинг бу асарини шу ном билан көлтиради. Ёқут ал-Ҳамавий эса «Иршод ул-арийб» номли асарида уни бир оз бошқачароқ «Ар-Роиз фи-иълм ил-фароиз» деб көлтиради. Асарнинг бизгача етиб келгани ҳақида ҳозирча ҳеч бир маълумот учратмадик.

## **«РУУС УЛ-МАСОИЛ» («ТУРЛӢ МАСАЛАЛАРНИНГ МУҲИМИ (БОШИ)»)**

Гарчанд Ибн Халликон бу асарни шу ном билан атаган бўлса-да, Ёқут ал-Ҳамавий «Руус ал-масоил фи-л-фиқҳ» деб тўлиқроқ атаб, унинг фиқҳ масалала-рига оидлигини аниқ кўрсатган. Шу билан бирга бу асар бაъзи манбаларда «Руки ул-масоил» номида ҳам учрайди. Асарнинг бир қўлёзма нусхаси Шестер Бе-атти кутубхонасида (3600-рақамда) сақланади. Ироқ олимаси Баҳийжа Бокир ал-Хусний уни тадқиқ этиб, Бағдодда нашр эттирган.

## **«АЛ-КАШШОФ»**

Аз Замахшарий ижодининг гултохи бўлган ва илм-фан оламида гоятда кенг танилган «Ал-Кашшоф» асари Қуръони каримга ёзилган машҳур тафсирдир. Асарнинг тўлиқ номи «Ал-Кашшоф ан ҳақоиқ ит-танзийл ва уйун ил-ақовийл фи вужуҳ ит-таъвийл» («Қуръондаги берк ҳақиқатларни ва уни шарҳлаш орқали ривоятлар кўзла-рини очгич») бўлиб, гоят қизиқиш билан ўқилади.

«Ал-Кашшоф» аз Замахшарийнинг ўзига ҳам гоят-

да манзур бўлиб, ҳатто у ўз асари ҳақида шундай ёзган эди:

«Чийдан ҳам дунёда тафсирлар беҳад кўпдир,  
Бироқ улар орасида «Ал-Қашшоф» кабиси  
йўқдир.

Агар ҳидоят изласанг, «Ал-Қашшоф»ни так-  
пор ўқи,  
Нодонлик бир қасал бўлса: «Ал-Қашшоф» унга  
шифодир.

Еттинчи асрнинг биринчи ярмида нозил бўлган Қуръон мусулмонларнинг муқаддас китоби бўлиб, у ўз тарихий ва маданий аҳамияти билан бутун Шарқ халқарининг маънавий ва ижтимоий тараққиётига катта таъсир кўрсатди. Бир томондан, Қуръоннинг ўша давр классик араб тилига хос мураккаб услуб ва тилда насрой сажъ шаклида ёзилганлиги, иккинчи томондан, мазмун ифодасининг чуқур ва кенг қамровлиги, табиийки, бу тарихий ёдгорликни тўлиқ тушуниб англашни қийинлаштирган. Араб тилини билган ҳар бир киши ҳам уни тўғри ва тўлиқ тушуниши қийин бўлган. Шу сабабларга кўра зарурат туфайли ўрта асрлардан бошлаб Қуръонни тафсир ёки шарҳ билан ўқиш одат тусини олган. Шу боисдан ҳам Қуръон нозил бўлган даврдан эътиборан унга бағишлиланган тафсирлар, шарҳлар ёзишга катта эҳтиёж сезилган. Турмуш тақозоси билан мана шундай вазиятда ислом тарихида Қуръонга бағишлиланган кўпдан-кўп тафсирлар, шарҳлар (асосан араб тилида) вужудга келган. Аз Замахшарий ҳам аввал ўзидан олдин яратилган Қуръон тафсирига бағишлиланган кўплаб асарларни қунт билан ўрганиб, ўз асарида улардан унумли ва танқидий равишда фойдаланган. Натижада мукаммал бир тафсир, яъни «Ал-Қашшоф» вужудга келган. Бу асар аз-Замахшарий Маккада турган пайтида уч йил давомида (1332-1334) ёзилган бўлиб, бу ҳақда муаллифнинг ўзи асарига ёзган муқаддимасида ҳам қайд қилиб ўтган. Асарнинг Маккада ёзилиши бежиз эмас, Макка амири Абу-л-Ҳасан Али ибн Ҳамза ибн Ваҳдос ас-Сулаймоний кўрсатган хайриҳохлик ва ёрдам, шубҳасиз, муаллифга анча қуляйликлар яратган. Чунончи у ўша пайтда маълум бўлган барча Қуръон тафсирлари ва шарҳлари билан яқиндан танишиш имконига эга бўлганлигини дадил айтишимиз мумкин. Мазкур тафсир ва шарҳлардан оқилона ва унумли фойдаланган аз-Замахшарий ўзига хос қимматли бир тафсир—«Ал-Қашшоф»ни

яратди. Бу ўринда аз-Замахшарийнинг буюк хизматларидан яна бири шундақи, у ўз тафсирини ёзишида ҳар хил сабабларга кўра кейинги авлодларга етиб келмаган, ўша пайтда машхур бўлган тафсир, ҳадис, фикҳ, илм ал-қироат, нахъу сарф, адаб ва бошқа илмларга оид кўплаб манбалардан унумли фойдаланган.

Асарда, айниқса, Қуръонниң филологик таҳлилига катта эътибор берилган, шу сабабли ҳам унинг филологик қиммати бениҳоя каттадир.

«Ал-Кашшоф» гоятда машхур асар эканлигига яна бир ёрқин далил сифатида унинг қўлёзма нусхалари кўплиги, асарга ёзилган бир қанча ҳбия ва шарҳлар сўнгги вақтларда дунёнинг турли бурчакларида қайта-қайта нашр қилинганини кўрсатиш мумкин. Немис шарқшуноси Карл Брөкельман дунёнинг турли қўлёзма фондларида «Ал-Кашшоф» нинг юзга яқин қўлёзмаси ва унга ёзилган йигирмадан ортиқ шарҳ ва ҳошия борлиги хақида маълумот берадики, бу далил аз-Замахшарий асарининг катта шуҳратидан ва муҳим аҳамиятга моликлигидан далолатdir. «Ал-Кашшоф» нинг аз-Замахшарий ўз қўли билан оқقا кўчирган дастхат нусхаси (528 ҳижрий, 1134 милодий йил) Техрон кутубхонасида сақланади. Гарчанд аз-Замахшарий ўзи муътазилий оқимиға мансуб бўлса-да, унинг бу асари ислом аҳли орасида шунчалик даражада машхур бўлиб кетдики, орданд юз йил ўтар-ўтмас «Ал-Кашшоф» нинг баъзи ўринлари қисқартирилган ҳолда араб олими Насируддин Абу Сайд Абдуллоҳ ибн Умар ал-Байдавий томонидан бир қадар ишланган шакли таълиф этилди. Ал-Байдавийнинг Қуръонга ёзилган бу тафсири «Анвар ат-танзийл ва асрор ат-таъвийл» («Қуръон нурлари ва шарҳлаш сирлари») деб аталиб, у тўлигича аз-Замахшарийнинг «Ал-Кашшоф»ига таянган ҳолда, шунингдек, бошқа манбалардан тўлдирилиб ёзилган тафсирdir. Дарҳақиқат, араб олимлари яқдиллик билан таъкидлашларича, аз-Замахшарийнинг «Ал-Кашшоф» асари ҳар хил даврларда Қуръонга ёзилган тафсирлар ичида етакчи ўринлардан бирини эгаллайди. Бу асар ҳозирги вақтгача араб мамдакатларида кўплаб мусулмон аҳли, айниқса олимлар учун энг зарурий китоблардан бири ҳисобланади. Қоҳирадаги бутун дунёга машхур «Ал-Азҳар» диний дорилфунунининг талабалари эса аз-Замахшарийнинг «Ал-Кашшоф» асари асосида Қуръонни ва унинг тафсирини ўрганиб, ундан муҳим бир дастур сифатида фойдалана-

дилар. Бу асар дунёниг турли шаҳарларида қайта-қайта нашр қилинган. Тошкентда, жумладан, Мовароунахр мусулмонлари Диний бошқармасининг кутубхонасида ва Ўзбекистон жумҳурияти Фанлар академияси Ҳамид Сулаймонов номидаги қўлёзмалар институти фондида ҳам «Ал-Кашшоф»нинг турли даврларда кўчирилган бир қатор нодир нусхалари сақланади. Асли тошкентлик ажойиб олим ва ҳаттот Аҳмад иби Маҳмуд иби Аҳмад Жамшид Шоший 1358 йили насхати билан кўчириган «Ал-Кашшоф»нинг ажойиб нусхаси Ўзбекистон Фанлар академияси Шарқшунослик институтида сақланмоқда.

Юқорида айтилган фикрлардан яққол кўриниб турибдики, хоразмлик буюк аллома аз-Замахшарий кеънгиги авлодларга бекиёс бой маданий мерос қолдирган. Чунончи ўзининг бутун умрини ва жўшқин фаолиятини илм-фан йўлига баҳшида этган, фанинг турли соҳаларига оид кўплаб асарлар яратган. Хоразм ўлкасида ва ўзи зиёрат қилган Шарқнинг турли шаҳарларида бўлган кўпдан-кўп шогирдларига жуда катта эътибор билан қараб, уларни камол тоғтиришга ўз ҳисеасини қўшган. Ўз даврининг машҳур олимлари билан дўстона муносабатда муттасил равишда боғланиб турган. Аз-Замахшарийнинг чукур билими, буюк даҳоси ва фанинг турли соҳаларига оид ўлмас асарлари ҳали у ҳаёт пайтидаёқ бутун мусулмон Шарқида унга бетакорор шуҳрат келтирган. Уни чукур ҳурмат ва меҳр билан «Устоз уд-дунйа» («Бутун дунёниг устози»), «Устоз ул-араб ва л-ажам» («Араблар ва гайри араблар устози»), «Фахру Хваразм» («Хоразм фахри») каби шарафли номлар билан атаганлар. Машҳур олимлар, шоирлар ва адиблар даврасида у доимо пешволардан бири бўларди, қизғин илмий баҳслар, мунозараларда унинг фикри инобатга олинарди. Мана шу зайлдаги улкан обрў-эътибор ва буюк даҳо, эҳтимол, унга ўз асарларидан бирида «ва инний фи Хваразм каабат ул-адаб» («чиндан ҳам мен Хоразмда адиблар учун бир катъман») деб ёзишига асос бўлган бўлса керак.

Юқорида қайд қилиб ўтганимиздек, аз-Замахшарийнинг бой илмий ва адабий мероси Шарқда ҳам, Ғарбда ҳам азалдан қадрланган ва бир қадар ўрганилган, унинг аксар асарлари бир неча хорижий тилларга таржима ҳам қилинган. Бу бизлар учун ёрқин мисол, намунали ибрат. Чунончи, жумҳуриятимизда, аз-Замахшарий ватанида улуғ аллома мероси ачинарли

тарзда кам ўрганилган. Унинг асарларидан бирортаси ҳам ҳали ўзбек тилига тўлиқ таржима қилинмаган. Шу сабабдан аз-Замахшарий асарларини мукаммал, ҳар томонлама ўрганиб, Ватанимиз халқлари тилларига таржима қилиш, улуғ мутафаккир қаламига мансуб бой меросни кенг жамоатчиликнинг ҳақиқий бойлигига айлантиришдек шарафли ва хайрли иш олимларимиз олдидаги турган долзарб вазифалардан бири бўлмоғи керак.

Ана шу олижаноб мақсад йўлидаги илк қадам сифатида буюқ бобокалонимиз, улуғ аллома аз-Замахшарийнинг «Нозик иборалар» асарини ўзбекчага таржима қилиб, Сиз, азиз китобхонларга ҳавола этдик.

Абу-л-Қосим Махмуд ибн Умар  
ибн Аҳмад  
аз-ЗАМАХШАРИЙ

# Ҳозик ибрагилар





Эй Аллоҳ! Ушбу (қалбимдан) сиртга балқиб чиққан нозик қалимаю ибораларни менга инъом қилинг, менга нисбатан файзинг ва иноятингни дариг тутмаслигинг — булар ҳаммаси комил неъматларинг туфайлидир.

\*

Бу ерда ҳақиқатни тинглашдан қулоқлар тўсиб қўйилгандир.

\*

Яна мулоҳазаю зеҳнлар тадбиру тафаккурдан ман этилгандир.

\*

Бир тоифа одамлар борки, уларнинг тўшаклари гафлат бешикларига обдон белангандир. Уларнинг кўзларида бедорлик (уйқусизлик) оз (кам) бўладики, бамисоли қоплонлар сингари.

\*

Э рабб, ўзинг суйиб ато этган нарсаларга етишувимизда бизни қўлимиздан тутиб етакла ва ҳасталанган кўнгилларимизга шифо бағишлаб, тузалишига йўл кўрсатиб, далолат бер.

\*

(Пайғамбарга мурожаат.) Биздан кўра сен Аллоҳга яқинсан ва дуоларга энг қўп ижобат этгувчисан!

Тўғри ва пок бўлган Омина ўғли (Муҳаммад алайҳиссалом) га иймон келтир. Қиёмат кунида қўрқуви бўлмаган бир хотиржам руҳ каби бўлурсан!

Отага нисбат бўшқага нисбатан шарафлироқ ва машҳурроқ, яъни фалончининг ўғли деб аталар, аммо Она эса доимо шафқатли ва матлаблироқдир.

Ёки илмли бўл, ёки илмга таяниб иш тутадиган бўл, лоақал илмни тинглаб эшигадиган бўл, бироқ тўртинчиси бўлма, чунки касодга учраб ҳалок бўласан (жуонмарг бўласан).

Агар бирор қайгу-алам юз бергани ёки таъзияли жойни эшиксанг, дарҳол у ерга бор, агар зиёфату меҳмондорчиликка чақирилсанг, унда ўзинг ўйлаб иш тут (ўзинг биласан).

Кудри тоифаси сингари талайдиган, Кудри қўши сингари учди-кетди. (Аввалига яхши гапириб одамнинг ичига кириб олиб, ўз ишини битиргач, Кудри қўши сингари тез ғойиб бўладиган кициларга нисбатан айтиладиган ибора).

Одамларнинг энг хотири кучлиси уларнинг ичидаги энг уннутувчисидир, кўнгилларнинг энг юмшоғи салобатлиги шафқатлисидир.

Мол-мулкни беҳуда исроф қилиш куфрона «неъматдир», ўйламасдан бойлигини сарфлаш тўлиқ та-наззулга олиб келади.

Подшоҳнинг энг яқин кишиси яқинларнинг ичидаги энг улуғидир, хавф-хатар пайтларида уларга (хавф-хатарга) яқинроғидир.

Тоғнинг энг тёпасига (чўққисига) чиқсан киши ундан йиқилувдан тоят кўп огоҳ бўлмоғи лозим.

Худо кўрсатмасин, агар сени оғир қайгу-ҳасратларнинг қучли ёллари ўраб олса, унда дод-фарёду фифонларинг фойда бермас.

Агар сенга нисбатан ўз биродаринг бирор хиёнат қиласа, унга яқинлашишдан ўзингни тий, унинг макруҳийласидан ўзингни муҳофаза этишга ҳаракат қил.

Имом Аъзам Абу Ҳанифа Нуъмон ибн Собит ҳазратларининг мазҳабига мансуб бўлган мўътабар, қадрли ва эътиборли имомлар дини исломнинг тизгинлариридир.

Пасткаш кўимсанинг ўз насл-насабини мақтаб, у билан фахрланиши, чанқоқ кишининг сув шуъласи (сараби)ни кўриб алдангани кабидир.

Бошингизга мушкул иш ва ташвиш тушганда мунис бўлиб, одамларга меҳр-муҳаббатлироқ бўласиз, аммо давлату неъматларга эришганингизда бағритошликка мойил бўласиз.

Аввал қилиб келган хайрлигу эзгуликларингизга кейин ҳам (яъни доимо) эзгулик қўшавёргинг, чунончи қушнинг қанотидаги кичик патлари катта патларига мададкордир.

Ўз биродарингни янчилган мушқдан кўра ҳам хушбўй сўзлар билан мақтаб ёд эт, гарчанд у сендан узоқ шаҳарда бўлса ҳам.

Фиску фасод қилувчилар ва фожирлар кўпайса, Аллоҳ таоло вабо юборади.

Ният қилинган ишлар пишмаган тўшт мисоли, бинобарин ҳар қандай ишни комил ният-у, қаттиқ ихлос билан қилиш лозим.

Хар қандай ишни бошдашдан аввал Аллоҳнинг ризолигини ўйла, акс ҳолда қилган ишларингнинг ҳаммаси бехуда бўлиб, зое кетади.

Гунохкор бандаларга садоқатли бирор кимса бўлмас.

Кўпчилик одамларнинг юраги уларнинг пешонасидан кўра ҳам кичикроқ бўлади.

Аҳмоқ киши ҳикмат лаззатини билмайди, бамисоли тумов киши гулнинг ҳидини сезмаганидек.

Бирор мамлакат (ҳокимият) ишларининг орқага кетишига сабаб—вабо кўп, бўлиб, тузукларию тартиботларининг сусайишиданdir.

Огоҳ бўлингизки, карим ва хурматли вафодор одами ийқотиши эр кишига вафотдан кўра ҳам оғирроқдир.

Агар ёмон йўлдошга эргашсанг, унинг оғуси билан заҳарланасан, яхшиси унинг душманлари жумласидан бўл, шунда унинг оғусио заҳматидан кутуласан.

Аллоҳ таолонинг наздида бандага яқин бўлган қийинчиликдан икки енгиллик бор, лекин бу қийинчиликка тушган кимсага икки Наср ўлдузи улардан ҳам яқинроқдир.

Аллоҳ таолоки сувда кемаларни мусаххар қилди (ўз итоатига олди), яна у (Аллоҳ) фалакларни осмону фалакда юритди.

Тўгри ва ҳақ йўлдан юрган қишининг юриши арслон юришидан кўра ҳам маҳобатлироқ (ҳайбатлироқ) дир.

Ҳалол-покиза киши доимо хотиржаму тинчликдадир, бировга хиёнату ёмонлик қиласидиган киши эса ҳалокатга гирифтдордир.

Агар бўхтон (ёлғон) чи ғудурлабанда сен ҳаммадан кўра ҳам кўп эшитгувчисан, ҳақ гап сўйланса сен гўё эшитмагандай бўласан.

Ўз биродаринг сўзини сукут сақлаб тинглаб, унинг ҳурматини ўрнига қўй, гарчи уни эштишига рағбатинги ва майлинг йўқ бўлса ҳам.

Низо қилиш ҳақида сенга фатво берсалар-да, тажрибадан ўтиб синалган киши билан низо, баҳс ва мунозара қилишдан сақлан.

Арслон болаларининг онаси болалари оз бўлган онадир, от болаларининг онаси болалари кўп бўлган онадир.

Одамнинг сиртию ботини (ичи) тўгри, саломат ва тузук бўлса, унинг зоҳири (ташқариси) ҳам сахий ва салим бўлур.

Агар тилингнинг ортиқча сўзлашига эга бўла олмасанг, унда тизгининг жиловини шайтонга топширган бўласан.

Одамлар ичидаги энг ярамаси хасисидир, уларнинг ичидаги энг ялқови—насткашидир.

Пора фақат ноҳақлигу золимларга ёрдам бергувчи дидир.

Жангу жадал аҳллари гоҳ шодлиг-у, гоҳ хафаликда бўладилар.

Сизлар бир-бирингиз билан дўстсиз ва бир-бирингизга азисиз, ваҳоланки бу бошингизга бирон-бир ҳасталик, очлик ва бошقا баъзи мусибатлар тушмаган пайтдадир.

Эй, ҳийласию тадбири ва фикр-мулоҳазаси кучли киши, йиққан мол-дунёинг хотинингни (иккинчи) эри учун йиғилгандир.

Агар иффат ва виқор соҳибларидан бўлмасанг, хору зорлик, таҳқири тубанликка мудом гирифторсан.

Сиймонг гўзаллиги ва юзинг чиройи ойнинг тулуъ (чиқиши) кечасидан бир белги каби дилу қўнгилларга шодлик бахш этар.

Қайсики молу мулкнинг закоти бажо келтирилса (берилса), унинг хайру баракати кўп бўлади.

Кўпчилик одамлар ҳақиқатдан йироқдир, уларнинг талаб ва даъволари ёлғону бўхтон (ботил)дир, яъни айтган сўзларию ишлари ўзларига мувофиқдир.

Одамларнинг энг азиз ва ҳурматлилари қайғу-ҳасрату ташвишли дамларда билинур, гўёки бу ташвишлар улар (ҳурматли кишилар) учун туғишган опа-сингилдек яқиндир.

Ёмон фикр соҳиблари ҳам, куфр неъмат қилувчилар ҳам ёвойи қобонлар мисоли Аллоҳ таолонинг мағфира-тидан йироқдирлар.

Устингга кексалик кийими ташланган бўлса ҳам, бироқ сен узоқ умр кўриш ҳирсида (таъмасида), янги янги кийимлар киймоқдасан.

Ёмғир сероб ёқсан сувли ерга экиладиган уруғлик бўлма, чунончи бу ҳол ҳазинада турган буғдой мисо-лидир.

Эътимод (суюниш) ни истаган кимса фақат Аллоҳ таодога эътимод этсин, акс ҳолда ҳалок бўлувчилар каби ҳалокатга учрайди.

Низо ва нифоқ мавжуд жойда нохушлик бўлар, қайгу-хасрату фақирликка тушилур.

Савдогарнинг шухрати ва обрў-эътибори киссасида, олимнинг шухратиу обрў-эътибори ёзган китобларида (асарларида).

Ўзингга мерос қолдириладиган мол-мулқдан узоқда бўл, чунки у мол-мулкнинг гуноҳи-ю, барча машақлатари сенга келади.

Котибнинг ёзув хати билан қоралаш (ёзиш) гўзал қизнинг ёноғида бўлган гўлдан гўзалроқдир.

Сен залолат тўлқинига ўзингни уриб сузсанг, сени фақат кўп тоат-ибодату тасбеҳлар қутқазур.

Гўштдан ҳаддан ортиқ даражада тановул қилдики,

ҳатто ичини мой босиб ёрилиб жетди (кўп овқат ейиш турли иллатларга сабабдир маъносида).

Мен рўзадорман дейсан-у, аммо ўзинъ бўлса бирода-ринг гўштини ейсан (гийбатлар ва хўрликлардан сўзлайсан). \*

Саховат ва ҳалимлик Хотамтойга мансубдир, дин бўлса дини исломдир, илм эса Имом Аъзам Абу Ханифа. Нуъмон ибн Собит илмидир.

Ақлли, гофил кишининг (сукут сақлаб) жим туриш ҳолати жоҳил, паришон кишининг узридан афзалдир.

Мардонавор киши мағлуб бўлгани билан унинг мартабаси паст бўлмас, машаққату ташвишга гирифтёр бўлса-да, хор бўлмас.

Айвони атрофида қушлар учиб-қўнадиган жойи бўлмаган уйга ёмғир ҳам барака бермайди, унинг эгаси ҳам эркинлик билмайди, у жой фақирликка гирифтордир.

Момақалдироқли ёмғирнинг ёғиши, роестгўй (ҳақгўй) кишининг ваъдасига вафо қилиши мисоли ёқимлидир.

Ўтган умрингни мулоҳаза этиб тавба қилишга шопшилгин, чунки ажал етса, уни кечикириш ҳеч кимнинг қўлидан келмас.

Хийлакорлик кўзи ғилайлар билан биргадир, улар доим айрилмасдир, ғилай кўзлар эса хийласиз бўлмас.

Қарзи бўлмаган киши холису соғдир; бир кишининг гўзал ишлари бор деб таъкидланса, бу сўз унга

нисбатан камчиликдир. (Яъни, шуҳрат Бани одам учун оғатдир).

Уздининг ва шарафингни сақлайдиган нарсаларни қаттиқ тут (яъни ол), ўзинг учун қулайроқ, енгилроқ бўлган нарсани олма, бинобарин, машаққатига яраша савоби ҳам бўлади.

Ўзини сахий, мард ва ҳиммати баланд кўрсатиб, аслида хору зор, ҳақир ва қадри тубан бўлган одамлардан қўрқ, токи бир кун ўзларининг хасисликлари бирла онгсилийдан мард одамни тузоқларига туширгайлар.

Ноқису етишмовчилик чодир қурди, баҳту иқбол унинг ҳамроҳи бўлди; илму фазилат сафарга чиқди, йўқлигу бебахтлик ён атрофдан унга итоат қилди; жоҳишу нодонлар қаерда бўлса иқболу баҳт уларга томон боққан, олиму фозиллар эса қаерда бўлса баҳтсиздирлар.

Хайвонга яхшилик қиласанг севинади, ҳайвон севинса эгасини тепади (одам боласи ҳам мана шунга ўхаш: агар у ташвишу машаққатдан холи қолиб, ўзини эркин сезса, фисқу фужурга рујку қўйиб, иқинларини қийнаб, азоб келтирур).

Бу дунё ибратли ишлар-у, панд-насиҳатларга тўладур, айни вақтда кўз ёшларига ҳам сероб.

Мутакаббр одамнинг давоси димогидаги такаббурликни йўқотиш билан ва кибру ҳавога ундовчи шайтонни бурун тарновидан кеткизиш билан бўлади. (Бу ҳол шундайки, мутакаббр кишини ҳақорат қилиш, хўрлаш бирла бўлур, чунки шайтон унинг бурни олдида такаббурликка ундар ва уни (шайтонни) қувлаб чиқариш бирла бу кулфатдан қутулар ва шифо топар, башарти такаббурлиги кетмаса, унда ҳалок бўлиши муқаррар).

Бир пайт келиб замона мустаҳкамлиги билан машхур бўлган ал-Хаварнақ номли саройни вайрон қиладики, гўёки ўргимчак уясиини вайрон қилгани мисоли.

Барча ишлардан оғек — Аллоҳ таолони хеч бир ишингда назарингдан қочириб унумта, ҳар бир тасарруфингда одил бўлиб, бирорвга зулм қилма.

Кўпинча фисқу фасод қилувчилар бир нарсани гумон қилиб, уни ҳақиқат деб ҳисоблар, ҳолбуки пировардида унинг нотўғри эканлиги равшан бўлар.

Тилингдан чиқсан садақа (яъни панду насиҳатинг ва мавъизаю ҳасананг) баъзан кўлингдан (мол-дунёнгдан) чиқсан садақангдан кўра хайрлироқдир.

Кўпинча вақтида ишлатилган ҳийлаю тадбиркорлик кучу қувватдан голиб келур.

Арслон нафақат чуқур қазиш билан овланиб қолмай, кўпинча у ҳийла билан ҳам овланади (қўлга туширилади).

Кўп вақтда зиёдалик, ортиқлик зиён келтиради. Масалан, бир қўлда олтита бармоқ бўлса бу ортиқлик бўлмай, камчилик (нуқсон) ҳисобланади.

Баъзи ҳолларда фатво истовчи киши фатво берувчи муфтийдан кўра ҳам олимроқ бўлади, чунонча «ал-латий» калимаси гарчанд бу сўзининг кичиклашган шакли бўлса ҳам барибир маъно жиҳатидан асли «ал-латий» сўзидан кўра кучлироқдир. (Бу ўринда сўз ўйини бўлиб, арабий истилоҳлар ишлатилган).

Баъзи одамлар ўз яқин қавм-қариндошларига хайм ру эзгулик кўрсатмай, яқин (қариндош) лиги бўлмаганларга эҳсон қиласадур — туяқуш ўз тухумларини ташлаб, бошқалар тухумларини босиб ётгани мисоли. Яъни, баъзи телба одамлар борки, ўз қариндош уругининг ёрдамга муҳтоҷлигини кўратуриб унга ёрдам қилмай, бехуда ёту бегоналарга эҳсон қиласади.

\*

Қанча одамлару қавмлар борки, сизга гўё үп каби эшилиб мулозамат қиласадилар, лекин улар пайт пойлаб фасод чиқаришга интиладилар, гафлатта тушшиб шундайларга сира алданмангизлар.

\*

Сени зиёрат қилувчиларнинг неча зиёратлари борки, уларнинг зиёрати арслон товушининг даҳшатини эшитишдан ҳам оғирроқдир.

\*

Сени кечаю кундуз зиёрат қилувчиларнинг кўпчилиги сени ҳаддан ортиқ қўкларга кўтариб мақтаб, охир-оқибат адватга дучор қилувчилардир.

\*

Кўпинча тил билан етказилган жароҳат, қилич билан етказилган жароҳатдан оғирроқдир.

\*

Кўп сўз-иборалар борки, одамларга улар фасоҳатли кўринса-да, Аллоҳ наздида улар номақбулдир — сўзловчини ҳам, эшитувчини ҳам мулзам қилур.

\*

Кўп сўзлар борки, улар сени жангужадалга солиб, ҳалокатга гирифтөр қиласади ёки улардан қайтарса ҳам елка чуқурингни гул каби қизарған ҳолга келтиргандан кейин қайтаради (яъни кўп машақкатлардан кейин).

\*

Ҳийлаю риё билан йиғлаш ва овоз чиқариб намоз ўқищдан савоб ҳосил бўлмас, башарти у соғ ният билан астойдил бўлмагандан кейин.

**Арслоннинг ўз уясида ҳайқириб ўкириши, баъзи (мени) зиёрат қилувчиларнинг бир маротаба зиёратидан енгил ва ёқимлироқдир.**

**Еру заминнинг кўркамлиги олимлар билан бўлса, осмону фалакнинг зийнати эса юлдузлар биландир.**

**Мухаммад пайғамбар алайҳиссаломнинг тутган йўллари менинг йўлимдир, бахту саодатим ҳам, нажотим ҳам шу йўлдир.**

**Бозорчилар (бозорда олди-сотди қилувчилар) сулуқия итлари мисолидирлар (Сулуқ Яман вилоятидаги бир қишлоқнинг номи бўлиб, у ерда фақат ов учун ярайдиган итларни — тозиларни асрайдилар).**

**Ловиллаб ёнаётган оловни сув ўчиргани қаби нодон одамлардан чиқаётган алангани ҳакиму оцил одамлар сўндираплар.**

**Ҳаёт вақtingда берган инъом-эҳсонларинг, гарчи уларни туки йўқ (қирчанғи) бўрига берган бўлсанг-да, зое кетмас, қиёмат кунида буларнинг ажри сенга бўлур.**

**Иккисининг орасида қанчалик катта фарқ бор; бири фулон имом Боқир сингари дебеъийнларнинг машхур олимидир — унинг онаси каррам оллоҳу важхуха Умм Абдуллоҳ бинт Ҳасан бин Алидир, аммо иккинчи фулон эса бақардан, яъни сигирдан сира фарқи йўқдир. (Каррам Оллоҳу важхуху — Аллоҳ юзини мунаввар қилгур!)**

**Бир одам бехосдан (ногаҳон) хасиснинг таомидан тановул қиласа, у (хасис) юрак оғриғига мубтало бўлур.**

башарти у қасални бирор фақир киши келиб зиёрат қилса, хавфидан бош оғриғи пайдо бўлур.

\*

Ўзингга зарур бўлган ҳар қандай керак нарсани сотиб ол — бу эркак кишининг муруватини, қудратини, эрлигини кўрсатади. Чунки ўша нарсани бирордан сўрасанг, у сен сўраганин эмас, бошқачароғини беради (инсоннинг табиати шундай), сотиб олганингда эса ўзингга керагини танлаб оласан.

\*

Сув йўллари ирмоқлари билан бўлгани каби шарифатнинг тўғри қонун-қоидалари эса пайғамбар алайҳиссалом таълимотлари биландир.

\*

Таомга ортиқ даражада ҳирс қўйишлик худбину пасткаш кипиларнинг ахлоқларидандир.

\*

Олижаноб ва шариф киши шундай кишики, у ҳозир бўлмай ғойиб бўлганида унинг сухбатини хоҳлаб, мулоқотини орзу қиласлар, башарти у (сухбатга) келиб колса, унинг ҳайбатидан сергакланиб ҳушёр тортарлар.

\*

Қуёш нурларини беркитиб бўлмаганидек, ҳақиқатнинг чирогини ҳам сўндириб бўлмас.

\*

Саҳбон ўғли Ажлоннинг оғзидаи чиққаси фасоҳатли сўзларнинг ўзи бир хулқу табиатдирки, у буларни отаси (Саҳбон)дан олган.

\*

Сенга эзгулик кўрсатған кимсага эзгулик қилгин, чунончи Жавзо юлдузи ботгандан кейин Шиъара юлдузининг порлапи гўзалдир.

\*

Ислом динида икки «шин» ҳарфлари катта айблардандир, бири — ҳокимларга — ришват (пора) бериши ҳам, олиш ҳам, иккинчиси айблilarга шафоат қилиш. Гап шуки, пайғамбар алайҳиссаломдан: «Лаъна оллоҳу

ар-роший ва-л-мурташӣ», яъни «ришват (пора) олув-чига ҳам, берувчига ҳам Аллоҳ таолонинг лаънати бўлсин», деган ҳадиси шариф содир бўлгандир.

\*

Қиморбозлар ой нурини ғанимат билиб қимор ўйнасалар, туилари қиссаю ҳикоятлар тингловчилар эса бедорликка нарво қилмайдилар.

\*

Езилган китоб нусхасининг тўғрилиги кўз қора-чиғининг боққанига боғлиқдир, ривоятнинг инобатлиси (ишончлиси) эса сероб сувдан ҳам ортиқроқ қондирад.

\*

Баланд тоғларга кўтарилиб ва пастликларга тушиб сафар қилиш уйда, деворлар ичидаги маҳкаматлар орасида оч ўтиришдан авлодир (хайрлидир).

\*

Ўз вақтидан кечикиб берилган инъом-эҳсон маҳкаматортилган занжир мисоли қаттиқ бўгувчиидир.

\*

Хунарманду косиблар кўпдир, бироқ моҳиру қобилятиллари оздир (яъни, уста кўпу, устаси оздир).

\*

Икки нарса бир дарахтнинг бутогидир, яъни, иккаласи ҳам бир хилдир: бирор нарса сўраганга (тилаганга) берса-ю, аммо кейин уни миннат қиласа, иккинчиси, ўзининг инъом-эҳсонини аяб, хасислик қиласа, чунончи Аллоҳ таоло наэдидаги миннат билан бир нарса бериш ва хасислик қилиб бермаслик қабоҳатда баробар ҳисобланади.

\*

Зиммангда фарз бўлган нарсани қарз ва бурч ўрнига қўй. Бу ҳол қалбингу дилингга роҳат баҳш этиб, шону шарафинг ва обрўйинги сақлаш учун энг тўғри йўлдир.

\*

Оlam узра шундай юргинки, то бутун olamning

елкасига оёқ қўйгандек бўл, шунда жами маҳлуқотдан (борлиқдан) устун бўлурсан.

\*

Аллоҳ таоло ато қилган турли неъматларнинг лаззати қудрат ҳолвасидан тотлироқдир. Аммо миннат бўлган ҳолатда эса зақум (жаҳаннам дарахти) меваенинг аччиғига қараганда ҳам аччиқдир.

\*

Узи сазовор бўлмаган ҳамду саною мақтovларни талаб қилиш уяtsиз, телба одамларнинг одатларидандир.

\*

Тавба қилган киши умрининг ниҳояси (хотимаси) умрининг боши деганидек (яъни, онадан туғилган куни каби гуноҳсиздир), унинг ишлари Аллоҳ таоло наздида айбли бўлмайди.

\*

Араблар тоифаси набъя (қаттиқ) мустаҳкам ёғочи сингари ҳам қувватли, ҳам юраклидирлар, ажамлар (ғайри араблар) эса тараб (бўш, мўрт) ёғочи каби юмшоқдирлар.

\*

Мисвоклар (тиш тозалагичлар) билан оғзингни тозаладинг, кошки энди бундан кейин сен оғзингни (тилингни) бўҳтон, ёлғон, гийбат сўзларни айтиш билан булғамасанг.

\*

Кир араблари (яъни, бадавий саҳройи араблар) ўлқама-ўлка, учиб юрувчи қарғалар мисоли бўлса, хабаший қора араблар эса тўғри, дуч келган нарсаларни еб юрувчи бўрилар кабидирлар.

\*

Сенга маломат билан кўп ҳолларда мудом ваъз қилдилар (сенга кўп маломат қилдилар маъносида), буларнинг ўрнига сени ғафлатнинг давомли уйқусидан уйғотганларида маъкул бўларди.

\*

Илмли бўлиш бир баланд тоққа чиқиш каби кўп машақатлидир, лекин ундан тушиш осондир, жоҳил-

лигу нодонлик булоги чуқур чашма мисоли бўлса-да, бироқ у кўп қийинчилигу азобларга гирифтор қиласди.

\*

Емон, норасо эътиқод билан қилинган эзгу иш — сароб ва кул каби ҳеч қанақа фойда бермайди.

\*

Илмли бўлиш ўқиш, ўқитиш, ёзиш билан ҳосилу муқаммал бўладиган бир сабоқдир. Агар олим киши чиройли, хушхат ёзувга эга бўлса, бу унинг камолотга етганидан далолатдир.

\*

Сени қасоду инкисорга учрашдан огоҳ қилувчи кишига лутғ билан муомалада бўл, қўрқма, зарари йўқ, зиёни йўқ, деб юпатувчилардан узокроқда бўл.

\*

Эзгулик, хайрли ишларга астойдил кириш, уларни пайсалга солиб, кейин қиларман деган ўйлардан воз кеч, шайтон йўлдан урадиган шошма-шошарлик билан эмас, тафаккур ва идрок билан иш тут.

\*

Риё бор ҳар қандай ишда раволигу зиё йўқдир.

\*

Елғончининг қасами бор (ҳақиқий) илмининг ҳам сохталигини оширади.

\*

Дин хусусида бўладиган мусобақа (мунозара) ларда комил эътиқод билан эътиқод қил, шунда ҳар қайси майдонларда олдинда бўласан.

\*

Менинг кўзим фақат сизнинг яқин бўлишингиздан қарор ва тинчлик топадир, чунки ошиқ ва муҳиб ўз маъшүқасига яқин бўлмаса роҳат олиб шод бўлмайди.

\*

Сотиб олган нарсангда алданиб, молиявий зиён-заар кўрувинг сен бундан келгусида кўрадиган зиёнларингдан анча енгилроқ ва осонроқдир.

Сенинг қилаётган ишларингдан душманинг огоҳ бўлиб, улардан кўз юмиши сенга илон чаққандан кўраҳам зарарли ва мاشаққатли бўлади.

Уруғликни ҳам, пўчоқни ҳам, нияту орзуларни ҳам, муҳаббату фироқни ҳам яратувчи Аллоҳ таолодир.

От учун ҳар доим қамчи лозимдир. У гарчанд елиб-югурадиган тулпор бўлса ҳам.

Еш хурмо билан унинг пўчоғи орасидаги фарқ араб билан ажам (гайри араблар) орасидаги фарқ кабидир (бу ерда араблар хурмо қабилида, ажамлар эса унинг пўчоғи қабилида келтирилаётир).

Дехқончилик қилиб зироат экиш фойдаю хайр барака бирла муштаракдир, ўз ҳалқини бехад кўп хайр баракага буркайдир.

Еру заминда ўзини инсон (одам) ҳисоблаб юрган одамлару (нос) одам сифатли олчоқлар (нувайс) бордир. Шу одамлар жумласидан ҳазрат Товус (Мухаммад пайғамбар алайхиссаломнинг машхур издошлиаридан Абу Абдураҳмон ибн Кисонинг лақаби шундай бўлиб, у ўз фазли-камолоти ва муруввати билан машҳур зот эди) ва Тувайс (Мадинаи мунавварада яшаган, ярамас одатлари ва шумлиги билан машҳур бўлган бир кимса) ҳам бордир.

Ярамас ва хасис кишининг эшигини тақиллатишда сахий ва мўътабар кишининг озиқ тишини суғуриш билан баробар ранжу изза бордир. Яъни, сахий киши иши тушиб заруратдан хасис одамнинг эшигини қоқса, у буни ўзининг озиқ тишини суғуртиргандек озору азият чеккан ҳолда қиласди.

Бу дунё мол-мulkини ўз зиммангга ва бўйнингга олишликда оғир ва масъулиятли бурчлар бор (яъни, ўзгаларнинг шон-шарафлари билан бөғлиқ ишларни гарданингга олишда ўйлаб иш тут маъносида).

Аллоҳ таолодан астойдил илтижо билан ўтиниб сўраган кимсанинг нидоси сира ноумид қолмайди.

Ақл-идрок ва шариатга амал қилиб иш тутган бандада асл ва иқкинчи даражали мақсаду матлабларини жам қилиши муқаррардир.

Гоҳ вақтда Жоҳил киши ақл-идрокли кишининг сухбатида (йўлдош) бўлур, ундан бошқаларга зарар келмас, Фароқид юлдузи билан Суҳа юлдузи ҳам ёнмаён бўлгани каби (яъни, Суҳа юлдузининг кучи оз бўлса-да, шимол тарафидан Фароқид юлдузларининг яқинлашуви билан уларнинг нурлари заифлашмайди ҳам, камаймайди ҳам).

Кўпинча ёки баъзан Ҳасан ал-Басрийга ўхшащ буюкларни Ҳажжож Золимга ўхшашлар туғадилар, гўё шўр дентиз сувидан дур-маржонлар чиқдани каби.

Баъзida икки ярамасдан Ҳасан мисоли гўзал бир ўғлон дунёга келади, чунончи қон билан этнинг орасидан сут чиқади.

Илми-урфони ва ақл-фаросати билан машхур бўлган Абдулмалик ибн Қарийб Ҳорун ур-Рашидга ўз заковатли қалби ва кенг фикр-мулоҳазаси билан яқинлашди. Бу яқинлашув унинг Асмаи қабиласиданлиги ва шариф насабли эканлигидан бўлмай, илми туфайлидир, акс ҳолда Ҳорун ур-Рашид унга бармоғи билан-да ишора қилмасди.

Шод-хуррамлик ва ярамаслик әзгулик ва ёвуалика муқорана қилинди, яъни шод-хуррамлик әзгуликка, ярамаслик ёвулигу қайгу ҳасратга муқорин (баробар) бўлди.

Ривоятларга кўра, Зиёд ўғилларини комил инсонлар дейдилар. Унинг етти фарзандининг ҳар бири шоирларнинг энг пешвоси бўлиб, балогат ва фасоҳатда етук эдилар. Бироқ улардан кўра ҳам илму шарифни юқори мартабага кўтарувчи шундай олимлар борки, улар илмларига амал қилиб, шариат аҳкомларини — қонун-қоидаларини юқори кўтарувчилардир.

Ўтган замонларда илму фазилат соҳиблари подшоҳларидан ўз оғирликларига баробар олтин ҳади олардилар, аста-секин замонлар ўтиши билан уларнинг қийматлари камайиб, итлару олмаҳонлар (қармоқлар) улардан афзал бўлиб қолди, яъни, нодонлар олимлардан ортиқ кўриладиган бўлиб қолди.

Агар бирорни айблаб итоб қилмоқчи бўлсанг, зинҳор ёзма тариқада (қофоз, хат билан) қил, чунки бирор-бирорга қарши бўлиб, айблаш кам ақллилар ва телбалар ишидир, шунингдек бу ҳолда кўнгилни сиёҳ қилишга сабаб бўлгувчи сўзлар ҳисобсиз айтилиши муқаррар, аммо хат ёзилганда эса, эмин-эркин ўйлаб, фикр-мулоҳаза билан ёзилади.

Мард ва карим кипи ҳатто ёмғирнинг булутини юқори кўтаради ва уни кечикитириш учун ўз яшинини сира ҳам аямайди (доимо мардонавор ишлар қиласи).

Сенга ибрат бўлиш учун фулоннинг баланд даражага эришиб, охир-оқибатда молининг мусодара бўлуви, яъни, барча молу дунёсининг байт ул-молга олиниши, ўзининг вазир бўлганидан кейин асирга олиниши, бирор айб туфайли ҳибсонага тушиши кабилар етарлидир.

Хар бир тирик қимса вақти келиб вафот этади, бас шундай экан энг яхши савоб ва солих ишларни қилиш ўлаётган киши учун ўта савобдир.

Хар бир йўл-йўриғ ва мазҳаб борки, очик-ойдин исботу далил билан ҳам тўғри бўлмайди, чунончи ўша мазҳаб ва йўлнинг ўзи тўғри әмас (эгри)дир.

Баъзан яқин қишинг — оға-ининг сенга гўё соқчи ва назоратчи каби бўлиб ўлимингни, яқин вақтда сенинг қабрга қўйилишингни истарлар: боланг — молдунё менга мерос қолади, дейди; туғишган оға-ининг эса ўглинг борлиги учун меросдан маҳрум бўлгани сабабидан сен учун астойдил жон куйдирмайди. Хулласи қалом, сен гафлатда бўлма — ҳеч бир қариндош уруғдан ва яқинлардан фойда йўқ, ўғлинг юрагига бўлаги бўлатуриб, сенинг тезроқ ўлишингни кутиб, меросга әгалик қилиш орзусида бўлгандан кейин бошқалардан не умид бўлгай?

Хар бир вазир қайчи мисолидир (агар қайчининг бир таянч томони бўлмаса иккинчи томони ҳеч нарсага қодир бўлмайди), чунончи Мусо пайгамбар вазири Хорун билан мукаммал бўлган.

Неча оқсоқ одамларни кўрдимки, илм-фазилат бобларида улар юқори погоналар (даражалар)га кўтарилиганлар, шунингдек, қанчадан-қанча соглом оёқлиларни ҳам кўрдимки, улар хайр-эҳсон йўлида бирор қадам ҳам босмаганлар (бу ўринда аз-Замахшарий ўзининг оқсоқлигига ҳам ишора қилаётир).

Ўлим қанчадан-қанча такаббур одамлар бошларини чуқурга, яъни қабрга улоқтирган.

Музалифа кечаси Арафа куни мисоли (ёргу) бўлолмагани каби (оддий) билимдон билан илм-фанга

кўп аралашшиб, тадқиқ ҳосил қилган олим орасида қанчалик катта фарқ бордир.

Одам болаларининг елкаларида туяларниг меҳнатлари бордур, яъни, ўзингизга қийинчилик келтирмасдан эриша оладиган мақсадларингизга туялар ёрдами билан эришиш мумкин.

Замона сен билан қанчадан-қанча ишларни бетўхтов содир қилмоқда, чунончи бир иш тугаса иккінчиси бошланиб туради — гўё нахву сарф қоидасидаги Зайд Амрга алоқадор мисоллар кўплаб келтирилганидек.

Қанча марта қирғин-барот, қонли жанг жадаллар пайтида ҳалокатлар бўлади, қанча марта лаб усти юпуну ялангоч кимсалар шиддатли жанг пайтларида ҳаддан ортиқ ҳолда ўз қалбларини очарлар, яъни, жанг жадал пайтида асл марду майдонлар ўзини ҳатто қурбон қиласди, кўп вақтлар қурол-яргисизу кийим-кечаксиз мардонавор кишилар яқдиллик кўрсатадилар.

Доим сухбатингда (ёнингда). Қуръони карим бўлсин, бироқ, мажлисингдаги сухбатдошингга (оддий) бир тентқур сифатидә бўлма (бир-бирингга илм-маърифатда ўзаро фойдали бўл маъносида).

Такаббурлики қанчалик хурсандлигу шодликка томон айлантиришга уринсанг ҳам асли лой бўлгандан кейин фаххар (кулол) сингари яна тупроқقا (лой) ишларига қайтиши муқаррар.

Аллоҳ йўлида фидойи, ҳақиқий мўмин-мусулмон, ахду паймон, эътиқоду иймонда Аллоҳга сабитқадам бўлинглар.

Ёмон, хасис киши ҳар бир тилда лаънатланади (ма-

ломат эшитади), саҳий, қарим қиши ҳар жойда иззату икромда бўлади.

\*

Соқол инсонга зийнатdir, фақат бўйин билан бирга бўлган ҳолдагина, узун соқол қўювчи аҳмоқ бўлади, чунки бунга ўтмишдан мисоллар кўпdir.

\*

Олижаноб ва ҳимматли одамнинг гўштини ҳасад ахли ейди, гўё қурт-қумурсқалар арслон боласини егани мисоли.

\*

Бир лаҳза назар билан ишқал ишлар тўғри бўлур, бош бармоқ қалта бўлишига қарамай бутун қўлни боғлаб туради.

\*

Одамлар орасида фикр-мулоҳазалиси қолмади, фақат Даҳҳок ва Вадак сингари ярамас, ёмонлари қолди. (Даҳҳок ва Вадак ўз фитнасию ёмонликлари билан машхур бўлган таниқли подшоҳлардир.)

\*

Бошқаларни ўз қарамоғио ҳимоясига оладиган қодир инсонлар бу оламдан ўтиб кетиб, яшашлари (ҳаёт бўлишлари) ҳеч кимгà наф келтирмайдиган одамлар қолдилар.

\*

(Хар доим) бирорвга итоб (айблов) қўювчи ҳеч вақт сайид бўла олмайди (яъни юқори даражага эриша олмас), қатрон (смола) қора бўлиб, унинг оқарув эҳтимоли йўқ бўлгани каби.

\*

Сенинг зиммангда банда ёки Аллоҳ олдидағи бурчлардан бир динор (лик)дан өртиқ бурчинг бўлмаса, ул олтининг сени олов (ўт) ҳандағига ташланишинга кафил бўла олмайди.

\*

Кечалар (тунлар) сенинг яқинларингу хешларингта

мангу қолдилар, уларнинг сенга мангу қолишлари тўғрисида гумон ҳам қилмаганимидинг?

\*  
Кўп ортиқча сўзлашув эшитувчини ранжитар.

Фосиқларга чин дўсту ўртоқ одам йўқдир, уларга фақат қайнар лагандаги ичиб бўлмайдиган қайноқ сувдан бошқа дўст йўқдир.

Қабоқатли суврат, чиркин юзнинг ва ёмон чехраннинг орқасида ярамас хулқдан бошқа нарса йўқдир.

\*  
Насиҳат этувчи сўз таъсиридан сени ким чалғитди. Ваҳоланки, у насиҳатчи сенинг азоб-уқубатлардан холос бўлишинингга сабабчи эди.

\*  
Саъй-харакат ва ижтиход табийи ва одатий бўлиб, афсуски бу саъй-харакат одамларда жуда нодирдир.

\*  
Мусулмон бўлган кишига Мусайлама сифатли бўлишлик сира ярашмайди (Мусайлама ғоятда фириб ва макр әгаси бўлган кимсаки, ҳатто нубувват (пайғамбарлик)ни даъво қилиб, бъязи «кароматлар» ҳам кўрсатган эди).

\*  
Туну кунни ўтказаман-у, лекин бугунги куним кечаги кунимдан яхшироқ бўлмаётир, чунки замона кундан-кунга ҳалокатга томон бормоқда, шундай экан, кечаги кун бугунгидан авлороқ, бугунги эса эртангидан яхшироқдир.

\*  
Тақводору мўмин кишилар соя-салқин жойларда, ҷурсию тахтларда бўлурлар, мужриму гуноҳкорлар эса залолат ва азобу оловда бўладилар.

\*  
Ғам-ғусса ва шодликнинг аломатлари шундайдир:

ғам-қайғу йиғлатур, шодлик кулдуур — бу белгилар манглай (юз-нешона)дан маълум бўлур.

Кўз ўз соҳиби (эгаси) нинг қалбida нима борлигини ифода этар: мұхаббатдан нима, нафратдан нима борлигини кўз сўзлайди, оғиз эса сукут сақлайди, бари бир юракда нима кечайдиганини очик-ойдин зөхир кўрасан!

Маъсият (гуноҳ) нинг тирноқлари надомату ўқинч билан кесилур, тоат-ибодатнинг қанотларига мудом ижтиҳод билан эришилур.

Эр киши гоҳ олға босар, гоҳ орқага чекинар, Машриқдан чиқиб Мағрибга ботадиган тонг ва оқиом юлдузлари (ан-Навъ) ҳам гоҳ ёмғир ёғдириб, гоҳ уни тўхтатади-ку!

Кимки адовару хусуматни экса, албатта у ташвишу машаққат ўради.

Неъматию муруввати доимий бўлган зотга итоату изм билдириш вожибидир.

Виждон азобию таънадан тўғри бўлмаган одамни (кимсани) таълим-тарбия ва қийнаш ҳам тўғрилаши амримаҳол.

Тилию дили тўғри ва ҳақгўй бўлган одамнинг хатою нуқсони кам бўлур.

Баъзан қаттиқ саъи-ҳаракат билан меҳнат қилиб, кўп машаққатларни бошидан кечирган инсон эришган натижা ҳам самараисиз, беҳуда бўлур.

Хатто Дорайн (Арабистондаги бир қишлоқнинг но-

ми) қишлоғида ўсувчи мушкнинг хушбўй хиди ҳам икки дунё ибодати лаззатига баробар келмайди.

Мансаб илинжида бўлган (қарам) кимсаларнинг томирлари кесилгандир, улар оладиган фармонлари эса бир-бирига зарба берувчилардир.

Кимки Аллоҳ таолога ҳамду-санони кўп қилса, у одам машҳур шоир Саҳбондан кўра ҳам балоғатли ва фасоҳатли ҳисобланади.

Кимки денгиз тўлқинларини бошидан кечириб са-фар қилмаса, турли-туман ташвишу мاشаққатларнинг сувидан ичмаса, у инсон (ҳакиқий) роҳату фароғатга мұяссар бўла олмас.

Дини исломга қалондимоғлик, беписандлик қилган одамнинг гуноҳи Убайдуллоҳ ибн Зиёд ва Язид ибн Муовия қилган гуноҳдан ҳам ортиқроқдир (Ибн Зиёд билан Язид ибн Муовия Карбалода ҳазрат Ҳусайннинг бошини кесганлар).

Ҳеч кимсанинг гўзал ҳайъат суврати (юз-кўзию ташқи қиёфаси) унга иззат-икрому обрў-эътибор олиб келмас, аксинча кўп ночор, камсуқум кўринишли-ю, эски кийимдаги кимсалар ўз фазилатлари билан улардан (кўркам кўринишлilarдан) устун келур.

Кимники мол-дунёсию бойлиги ўзидан узоқ бўлса, унинг аҳволи ночор (заиф) бўлиб, ҳалокатта гирифтор бўлур.

Ҳасталик ва муҳтоҷлик — булар иккаласи шундай бир балоки, ҳатто хутбон (энг тахир, аччиқ ичимлик-лардан ҳисобланади) ичимлигидан кўра ҳам аччиқдир.

Кимки ўз нафси балоси-ю, орзу-ҳаваси домига

(исканжасига) тушиб қолса, у бешак ўзини-ўзи чукур қаърига ташлагани муқаррардир.

\*

Мард ва олижаноб кишининг энг гўзал фазилатларидан бири ўз биродарининг айблариний бекитиб, унинг барча ишларини бамисоли ўзининг ишлари ўрнида кўриб иш тутишидир.

\*

Кимники қўлидан хайр-баракали ва пурҳикмат ишлар келмаса, унинг насабининг шарифлиги-ю, улуғлиги-фойда келтирмас.

\*

Дўстлик ва биродарлик даъвосида бўлувчиларнинг тарозиси шундай нарсаки, у шиддатли, ма-шаққатли бир ҳол бўлиб, ҳар қандай фарогату кенгликдан холидир.

\*

Ишончли ривоятчилар келтирган пайғамбар алайҳиссаломнинг ҳадиси шарифлари атиқи маъсур деб аталмиш (машхур) қиличга нисбатан ҳам ўткир ва кескирдир.

\*

Кимки баҳт-иқболли, солиҳ кишиларнинг этагига ёпишса, у албатта муроду мақсадига эришиб, хайру барака топар.

\*

Ўз ваъдасида турмаганда турли-туман важ-карсонлар кўрсатувчи кимса ҳеч қачон мард ва ҳимматли ийсон бўлолмайди.

\*

Тану баданинг соғлиғи энг буюк неъматлардан биридир; яна шу ҳол (сихат-саломатлик) баъзан фисқ-фасодлару гуноҳ ишларга ҳам сабаб бўлади.

\*

Алдамчилик ва хийлакорлик билан машҳур бўлган бурсақ деган йиртқич ҳайвондан ҳам қўра баъзи Бани одамлар кўпроқ алдамчироқдир.

Калтафаҳм ва бетавфиқ одамни фиску фасоддаи қайтарувчи нарса йўқ. Ўнинг жиловини (тизгинини) ўз ҳолига қўйиб юбориш уни янада баттар қиласди.

Солих амаллар қилмаган киши уруғсиз экувчига ўхшайди, чунки (вақтида) экин эккааларнинг омборлари тўла бўлур, экмаганники бўш бўлур. (Бунинг маъноси шуки, қиёматда ҳам, бу дунёда ҳам эзгу ишлар қилганлар ажр ва савоб олар, солих амалийўқ кишининг қўли бўш қолар).

Пайгамбар саҳобалари ва тобеъийнларнинг (издошлирининг ҳаётидан келтирилган) мисоллар гўёки асхоб ул-каҳф (гор эгалари) ва уларнинг тўртинчисиникига ўхшайди (тўртинчиси Қитмир исмли итдир). Ҳидоятли кимсаларга эргашгани туфайли у мақтovли ит бўлиб, жаннатга мустаҳиқ (сазовор) бўлди.

Қўрқувга мубтало бўлган киши (қуёш мисоли) фақат қочишидан нажот излайди.

Одамнинг умри аввалида қилган иши умрининг охиридаги ишларига ҳам далолатdir.

Узоқ умри давомида саъӣ-харакат ва одоб-ахлоқ билан ҳаёт кечирган одам, кейин одобга томон дастлабки қадам ташлаган кимса билан баробар эмас.

Илму маърифатли одам тақаббурлик қилувчи доимо нодон кимсаларнинг бурнини тўзон-тўпроққа тўлдирур.

Кўркам ҳаётнинг ҳосил бўлиб давом этишига сабаб бўлган нарса узоқ муддат сукут сақлашни ихтиёр қилишидир.

Гўзал сифат ва хусни хулқ сийратлари безамаган

кишини ҳеч қандай чиройли кийимлар кўркам қилолмас, гуноҳ ва хатолардан сақланмаган кимсанинг қалби сира айбдан фориғ бўлмас.

Такаббурлик ҳеч бир кимсанинг қадр-қиммати ва улуғворлигини зиёда қилмайди, у бор-йўги довул ичидаги шамолдан бошқа нарса эмас.

Яшил япроқлар остида етилиб пишган мевалар кўпинча оппоқ қоғозга битилган чиройли ёзувларга қараганда гўзалроқ саналади.

Мен била олмайман: булардан қайси бирининг машиққати кўпроқ? Денгизда кучли тўлқинлар орасида сузиб нажот излаган одамнингми? Еки икки-учта хотини бўлиб, улар билан тинч-тотув турмуш қила олмаган эрнингми?

Сенда икки ярамас одат мавжуддир: бири, кибрлилик ва калондимоғлик бўлса, иккинчиси, хасислиkdir. Сен юрганингда такаббурлик қилиб юрасан, муҳтоҷиши сендан бир нарса сўраса, йўқ дейсан.

Хайру эзгуликдан бошқа инсонга кўркамлик берадиган ҳеч нарса йўқдир, афсуски одамларда хайр ва эзгулик қилиш имкони йўқдир, унинг йўли бекилгандир.

\* Тадбиркорликда саъй-ҳаракат кўрсатиш, тақдиру қисматларда ғолибликка олиб келиш демакдир.

Одамлар турли-туман бўладилар, афсуски уларнинг аксарияти нопокдирлар.

Тоғ тепасидаги қояларни кўчириш миннат эшитиш юкларига нисбатан енгилроқдир.

Гарчанд узоқ умр кўрган бўлсалар-да, кўп одамлар  
тўр ва тажрибасиздир.

Сен етмиш ёшга кирган бўлсанг-да, ҳамон арслон  
мисоли йиртқич ҳайвонсан, чунки мол-дунё ҳирсида  
мудом қўлингни (ҳар томонга) чўзасан.

Хотин зоти агар қалбинг улар ишқига гирифтор  
бўлганини сезса, бурнингни тупроққа ишқайди.

Бу йўллар орасида улуғ дейиладигани йўқдир ва  
бир халқдирки, сен унга лойиқ эмассан (ўз замонаси-  
дан нолиш).

Қийинчилигу маشاққатлар ҳужуми азму қарор ва  
ниятларни чалкаштириб, бузиб юборади.

Кимники ҳимматию муруввати қанчалик кўп бўлса,  
шунга яраша одамлар унинг қайғусига шерик бўлар  
(хамдардлик билдирап)лар.

Ўзига бир насиҳатгўй қардош топган экан, аммо  
у буни шохи билан сузади деб гумон қилишига нима  
дейсиз?

Фақиру мискинларга вожиб садақаларни бажо кел-  
тирмаган бойларга жаҳаннамда даҳшатли бир хандақ  
бордир.

Хайр-саҳоват ва фазилат соҳибининг фарзанди ҳур-  
мат ва шону шарафга сазовор ва муносибдир, чунончи  
дур (инжу) садафга қараганда юқори даражададир.

Аллоҳ таоло еру заминни баланд ва улуғвор тоғлар

билан безаганидек дини исломни ҳам имом Аъзам Абу Ҳанифа илмлари билан яшнатиб, барака берди.

Ўткир қиличнинг бошга тушадиган зарбаси баъзи нодонларнинг ҳукми остида муте (итоатда) бўлиб юришдан афзалдир.

Ҳақиқат ва адолат билан тўғри сиёсат юргизмаган ҳар бир раҳбар ва бошлиқ қаттиқ азоб-уқубат ва балога гирифтор бўлур.

Қиличга қин (ғилоф) ва йиртқич қушда ўткир тирноқ бўлиши шак-шубҳасиздир (бу ҳикмат эр кишида керакли анжомлару қатъий азму-қарор бўлиши керак деган маънони англатади).

Можаро билан кўрсатилган муруватда (яхшилик) хайрлик йўқдир, гарчанд у-(хайрлик) чеяклаб қўйган ёмғир мисоли кўп бўлса ҳам.

Ваъда берганда Урқуб (ўз ваъдасини сира бажармаслиги билан машҳур бўлган шахс) каби ўз ваъдасини бажармаса, бир ишга астойдил қасд қилса-да, чаён сингари вафосиз ва хиёнат қилувчи бўлса, ундай кишидан хайр йўқдир.

Бани одамнинг солиҳ ишлари пайгамбар алайхис-саломнинг суннатларига мувофиқ бўлмаса, у ишлар мақбул ва юқори даражада бўлмас.

Хоким (хўжа) нинг қулига, бой-бадавлат кишининг фақир бечорага хайру эҳсондан бошқа ҳеч бир фазилати йўқдир.

Урмонларда арслонлар, боғларда илонлар бўлиши-нинг ҳеч бир ажабланарли жойи йўқдир.

Бирор масалада фикр-мулоҳаза қила бошлаганингда ҳеч бир ошиқма, ҳар томонлама ўйлаб, обдон фикрлаб иш тутгин.

\*

Хар бир гўзал аёлни кўрганда эс-хушидан кетадиган Муслим ибн Валийд сингари заиф мусулмонлардан бўлма.

\*

Вақти соати ўтгандан сўнг ижро бўладиган ваъдан ҳеч бир хайрлик бўлмас.

\*

Ўз нафсингга асир бўлмасанг, уни ўз хукмингда тутасан, акс ҳолда ундан ғолиб чиқиб, ушлаб тура олмайсан.

\*

Хар қандай мушқул иш ақл эгалари туфайли ислоҳ қилинур, чунончи еру кўк фақат ўз теграси қутблари атрофида айланар.

\*

Сайр қилувчи юлдузлар фалакнинг гардишидек бемалол сайр қила олмаганлари каби ҳалойиқ ва фуқаролар подшоҳлар даражасига эриша олмаслар.

\*

Хеч ажабланарли эмаски, баъзи жоҳил кишилар баланд даражага аришиб, олим ва доно одамлар қўйида қолар, чунки баъзи вақтда Судайл (Канопус) юлдузи кутб жанубида бўла туриб пастга тушар, аммо Наоим юлдузи каби кичик юлдуз бутун оламнинг боши устида турар.

\*

Марзамон юлдузлари чиқиб турганда, яъни, бу дунёда қоим бўлиб турганда замонада хайрлик йўқдир.

\*

Овланаётган ўлжа ҳайвонга арслоннинг тирноғи ботмас, қачонки у (ҳайвон) ўз уясида ётган бўлса.

\*  
Сидқидил ва сахий кимсанинг қалбидан бопиқа нарсанни сирларнинг сандиги қилма, яъни ҳар бир учратан кимсанни сирдош этмагин.

\*  
**Улар** доим гуноҳларга миниб олишдан тўхтамайди-лар, гўёки **улар** (гуноҳлар) йўлда минадиган ҳайвонлар (увовлар) идир.

\*  
**Эй одам, унутмоқлик** (паришонлик) сенинг одатинг-дир.

\*  
**Эй бутам, тилингни ёмон сўзлардан сақла!**

\*  
Бахилу хасиснинг қўли оқармас, яъни бирор нарса беришга очилмас — токи тил билан қаттиқ сўз сўзланмагунча, тоғдаги мавжуд бойликларни чиқариб бўлмас — токи лўм билан кучли зарба урилмағунча.

\*  
Эй, кибр соҳиби! Кимматбаҳо тошлиардан азизроқ бўлсанг-да, ҳақиқий инсонларга лойик бўлган ишларни бажо келтиргин.

\*  
Эй, молу мулк толиби (талабгори), сенинг кўкрак эмувинг муддати чўзилиб кетди, бас, етарли, қачон кўкракдан ажраласан... Тағин бу фойда сени жаҳаннамга солмасин?

\*  
Эй дунё, ўз фарзандларингга аввалида тотли (ширин) кўринасан, сўнгра аччиқроқ туюласан, уларга қарашасан — охирида улардан кечиб, айриласан.

Литературно-художественное издание  
**АБУ-Л-КАСИМ МАХМУД АЗ-ЗАМАХШАРИЙ**  
ТОНКИЕ ФРАЗЫ

Адабий-баджий нашр  
**АБУ-Л-КОСИМ МАХМУД АЗ-ЗАМАХШАРИЙ**  
НОЗИК ИБОРАДАР

Мухаррир Муборак Салижон қизи  
Мусаввир Хабибулло Абдулло ўғли  
Безаклар мухаррири Нусрат Ҳамидулла ўғли  
Техник мухаррир Жанинат Қодир қизи  
Мусаҳҳиха Мавлуда Носир қизи

ИБ № 3145

Босмахонага берилди 18.08.92 й. Босишига руҳсат этилди 12.10.92 й.  
Оғс. газет. қоғозга «Адабий» гарнитурада юқори босма усулида  
босилди. Босма тобоги 2,5. Шартли босма тобоги 4,20. Шартли  
кр.-отт. 4,60. Нашр тобоги 3,47. Нусхаси 100 000. Буюртма 802.  
Шартнома 10—92. Бахоси шартнома асосида.

Ўзбекистон Ёшлар Иттифоқи Марказий Қўмитаси «Камалак» нашр  
иёт-матбаа бирлашмаси, 700113, Тошкент, Чилонзор даҳаси, Қатон-  
тол кўчаси, 60-уй.

Ўзбекистон Республикаси «Шарқ» нашриёт-матбаачилик концерни-  
нинг Мехнат Қизил Байроқ орденли босмахонасида босилди. ГСП,  
700021. Тошкент, «Правда» рӯзномаси кўчаси, 41-уй.